

JOB

Tsa' ilabenti i pusic'al Job

1 Tsa' chumle ti lum i c'aba' Uz juntiquil winic uts'at ba i pusic'al, i c'aba' Job. Tsi' c'uxbi Dios. Tsi' canta i ba cha'an ma'anic mi' taj mulil. ²An i cha'an Job wuctiquil ch'iton ba i yalobilob yic'ot uxtiquil xch'oc ba i yalobilob. ³An i cha'an cabal i yalac' ja'el, wucp'ejl mil tiñame', uxp'ejl mil camello, jo'c'al i yuxbajc' (1,000) tat wacax yic'ot jo'c'al i cha'bajc' (500) i ña'al burro. An cabal i winicob ja'el. Ma'anic ñuc ba winic lajal bajche' Job ti pejtelel lum ya' ba' mi' pasel q'uin. ⁴I tilelach mi' melob q'uin jini ch'iton ba i yalobilob che' mi' ts'actiyelob i jabilel. Tsi' tempayob i ba ti' yotot jini woli ba ti q'uiñijel. Junlajal tsi' meleyob jini q'uin ti' yotot tac ti jujuntiquil. Tsi' payayob i yijti'añob i c'uxob waj yic'otob. ⁵Tsa' jal'ayob ti q'uiñijel. Che' ba tsa' xojt'i q'uin, Job tsi' paya tilel i yalobilob cha'an mi' saq'uesañoob ti' tojlel Dios. Tsa' seb ch'ojyi Job cha'an mi' yaq'uen Dios cotel tac ba i majtan. Tsi' pulu lujuncojt, jujuncojt ti jujuntiquil. Tic'al mi tsi' cha'leyob mulil calobilob, che'en Job. Tic'al mi tsa'ix i ts'a'leyob Dios ti' pusic'al. Che'ach tsi' ña'ta Job ti' pusic'al. Ma'anic tsa' lujba i mel bajche' jini.

⁶Ti jump'ejl q'uin tsa' tiliyob ángelob. Tsa' wa'leyob ti' tojlel Dios. Tsi' xin otsa i ba Satanás. ⁷¿Baqui tsajñiyet? che'en lac Yum. Tsi' jac'Λ Satanás: Tsajñiyon ti pañimil. Tsac cha'le xambal ñumel ti lum, che'en. ⁸Lac Yum tsi' c'ajtibe: ¿Tsa' ba a wen q'uele c winic Job? Ma'anic yamba ti pañimil mu' ba i c'uxbin Dios bajche' jini. Mi' cantan i ba cha'an mach mi' taj mulil, che'en Dios. ⁹Satanás tsi' sube: Mach lolomic mi'

c'uxbin Dios jini Job. ¹⁰Wen q'uelel a cha'an jini Job yic'ot pejtél i pi'lob yic'ot pejtél i chub'an. Ma'anic i tic'lantel. Tijicña mi' ñusan q'uin. Ma' coltan ti' ye'tel. Ma' p'ojlesaben i yalac' ti' joytilel. ¹¹Pero sats'ax a c'ab a chilben i chub'an. Che' jini mux caj a q'uel mi caj i p'ajet Job ti' tojel a wut, che'en Satanás. ¹²Lac Yum tsi' sube: Wolix calq'ueñet pejtél chuqui an i cha'an Job. Lu' an ti a p'atlel cha'an ma' tic'lan. Cojach jini c winic mach mejlic a tal, che'en Dios. Che' jini tsa' majli Satanás. Tsa' loq'ui ti' tojlel lac Yum.

¹³Mach jalix temel añob i yalobilob Job ti' yotot jini ascuñał ba. Woliyob ti we'el ti uch'el. ¹⁴Tsa' tili winic i suben Job: Tsaj q'uele woliyob ti top' lum tat wacax. Woliyob ti buc'bal jini burro ya' ti' t'ejl. ¹⁵Tsa' tiliyob sabejob ti leto. Tsi' laj xujch'iyob majlel. Tsi' tsansayob a winicob ti machit. Joñon jach tsa' mejliyon ti put'sel. Tsa' tili c subeñet, che'en. ¹⁶Che' ba woli to ti t'an tsa' tili yamba winic tsa' ba i yala: Tsa' tojmi chaje ti lum chocbil tilel ti Dios. Tsi' lu' pulu jini tiñame' yic'ot a winicob woli ba i cantañob. Joñon jach tsa' mejliyon ti puts'el. Tsa' tili c subeñet, che'en. ¹⁷Che' ba woli to ti t'an tsa' tili yamba winic. Tsi' yala: Tsa' tiliyob uxmojt caldejob. Tsi' xujch'iyob jini camello tac. Tsi' laj payayob majlel. Tsi' tsansayob a winicob ti machit. Joñon jach tsa' mejliyon ti puts'el. Tsa' tili c subeñet, che'en. ¹⁸Che' ba woli to ti t'an tsa' tili yamba. Tsi' sube: Tsaj q'uele a walobilob tempabilob ti' yotot jini ascuñał ba. Woliyob ti we'el ti uch'el. ¹⁹Tsa' tili sutujt ic' loq'uem ba ti jochol ba lum. Tsi' buchu jini otot ya' ba' añob. Tsi' laj choco tac jini oy ti chanwejlel i xujc. Tsa' laj chamiyob a walobilob. Joñon jach tsa' mejliyon ti puts'el. Tsa' tili c subeñet, che'en.

²⁰Tsa' wa'le Job. Tsi' tsili i bujc. Tsi' set'e i jol cha'an ch'ijiyem i pusic'al. Tsi' choco i ba ti lum. Tsi' ch'ujutesa Dios. ²¹Tsi' yala: Ma'anic c chub'an tsaj q'uele pañimil, ma'anic c chub'an mic cha' sujtel ti lum. Dios tsi' yalq'ueyon, Dios tsi' cha' chili. Ch'ujul i c'aba', che'en. ²²Che' jini ma'anic tsi' cha'le mulil Job. Ma'anic tsi' p'aja Dios.

2 Tsa' cha' tiliyob ti wa'tal ángelob ti' tojlel Dios. Ya'an ja'el Satanás ti' tojlel. ²Dios tsi' c'ajtibe Satanás: ¿Baqui tsajñiyet? che'en. Jini xiba tsi' jac'la: Tsajniyon ti pañimil ba' tsac cha'le xambal ñumel ti lum, che'en. ³Dios tsi' sube: ¿Tsa'

ba a q'uele c winic Job? Ma'anic yamba ti pañimil bajche' jini. Uts'at i pusic'al. Mi' cha'len chuqui toj. Mi' bac'ñan Dios. Mi' cantan i ba. Ma'anic mi cha'len mulil. Lolom jach tsa' xiq'uuyon ti' contra. P'ump'un tsa' tic'la cha'an mi' p'ajon, pero chan xuc'ul to quic'ot. Anquese ma'anic i mul tsa' lon ña'ta a techbeñon c mich'ajel cha'an mic jisan, che'en lac Yum.

⁴Satanás tsi' yala: Junlajal winicob, mi' bajñel c'uxbiñob i ba. Che'ach ja'el Job. Anquese ma'anix i chub'an, chan tijicna i pusic'al cha'an c'oc' to i bac'tal. ⁵Sats'ax a c'ab cha'an ma' waq'uen i chamel. Ya'to ma' wilan, mi caj i p'ajet ti' tojel a wut, che'en. ⁶Lac Yum tsi' sube: Awilan, mi caq'ueñet jini c winic. Cojach i cuxtalal mach mejlic a tal, che'en lac Yum.

⁷Jini cha'an tsa' loq'ui Satanás ti' tojlel lac Yum. Tsi' yaq'ue i c'amajel Job. Tsa' pasi tsoy ti' cocol, ti' xinjol c'alal ti' mal i yoc. ⁸Job tsi' loto i xejt'il uc'um cha'an mi' juc' loq'uel i pujwil. Tsa' buchle ba'an i tañil c'ajc.

⁹I yijñam tsi' sube: ¿Xuc'ul to ba a pusic'al a wic'ot Dios? P'aja Dios cha'an ma' junyajlel chamel, che'en i yijñam. ¹⁰Job tsi' sube i yijñam: Lajal ma' cha'len t'an che' bajche' tonto ba x'ixicob. Tsa'ix lac taja cabal wen tac ba ti' c'ab Dios. ¿Mach ba yomic mi lac taj wocol ja'el? che'en Job. Che' jini tsi' canta i yej Job. Anquese cabal i wocol, ma'anic tsi' cha'le mulil.

¹¹Tsa' caji i yubiñob uxtiquil i cañayo' ba, woli ti wocol Job. Tsa' loq'uuyob ti' lumal ba' chumulob, Elifaz ch'oyol ba ti Teman, Bildad ch'oyol ba ti Suha, yic'ot Zofar ch'oyol ba ti Naamat. Temel tsa' tiliyob i jula'tan Job cha'an mi' ñach'chocobeñob i pusic'al cha'an i wocol. ¹²Che' ba tsi' ñajti q'ueleyob, ma'anic tsi' cañayob. C'am tsa' cajiyoj ti uq'uel. Tsi' tsiliyob i bajq'uuil. Tsi' mujlayob i ba ti ts'ubejn. ¹³Wucp'ejl q'uin yic'ot wucp'ejl ac'alal buchulob ti' t'ejl. Ma'anic tsi' wis pejcayob, come tsi' q'ueleyob wen ch'ijiyem jax cha'an wocol.

Job tsi' ña'ta uts'at machic tsi' q'uele pañimil

3 Tsa' caji ti t'an Job. Tsi' p'aja i yorajlel che' ba tsi' q'uele pañimil. ²⁻³Tsi' yala Job: La' chojquic j q'uiñilel che' ba tsaj q'uele pañimil yic'ot jini ac'alal che' ba tsa' caji' cantañon c ña'. ⁴La' ochic jini q'uin ti ic'ch'ipan ba cha'an ma'anix mi' chan ña'tan Dios. Mach i tsictesan i saclel pañimil. ⁵La' yajpic ti ic'ch'ipan ba ti yaxñalel chamel. La' tilic total i mac. La'

puts'ic ti baq'uen. La' junyajlel sajtic. ⁶Jixcu jini ac'lalel, la' yajpic. Mach ochic ti tsic yic'ot yan tac ba q'uin ti jab yic'ot ti uw. ⁷La' callec ti' bajñel. Mach yomic mi' chan ña'tintel ti tijicña ba t'an. ⁸La' i p'ajob jini winicob yujilo' ba p'ajoñel mu' ba i yutsesabeñob i pusic'al jini jontolo' ba chay ti colem ñajb. ⁹La' yajpic i c'ac'al ec' ti' bajlibal q'uin. La' i lon pijtan i saclel pañimil. ¹⁰Come uts'at tsa'ic i ñusayon c ña' che' cantabilon i cha'an, pero tsi' yac'ayon ti pañimil cha'an mi cubin wocol.

¹¹¿Chucoch ma'anic tsa' sac jiliyon ti' ñac' c ña'? ¿Chucoch ma'anic tsa' chamiyon che' ba tsaj q'uele pañimil? ¹²¿Chucoch toca tsi' lotoyon j co'? ¿Chucoch tsi' lon tsu'sayon c ña'? ¹³Tsa'ic i cayayoñob cha'an mic chamel ñach'alonix. Tsa'ic chamiyon wayalonix ¹⁴yic'ot jini reyob yic'ot jini xcantesajob wen chumulo' ba ti oñiyi, ¹⁵yic'ot i yalobilob reyob tsa' ba i but'uyob i yotot ti chuba'añal letsem ba i tojol. ¹⁶¿Chuchoch ma'anic tsac choco c ba ti' tojlel c ña' che' maxto i yorajlelic? Che'ic jini, lajalon bajche' alalob mach ba anic mi' q'uelob i saclel pañimil. ¹⁷Jini chameño' ba ma'anix mi' chan tic'lantelob cha'an jontolo' ba. Jini lujbeñobix ba mi' c'ajob i yo. ¹⁸Jini ñup'ulo' ba ja'el mi' c'ajob i yo che' mi' chamelob. Ma'anix mi' chan ubibeñob i t'an i yumob. ¹⁹Temel añob ch'o'ch'oco' ba yic'ot ñuco' ba. Jini x'e'tel colbilix ti' p'atlel i yum.

²⁰¿Chucoch ma' chan aq'uen i cuxtilel jini ch'ijiyem ba i pusic'al? ¿Chucoch ma' chan aq'uen i cuxtilel che' ma'anix i wenlel ti pañimil? ²¹Yom chamel pero ma'anic mi' mejlel. Lajalch bajche' jini mu' ba i lon top' lum cha'an mi' taj jini letsem tac ba i tojol. ²²Tijicña i pusic'al mi tsa' mejli ti chamel. Wen tijicñayix jini mucul ba ti lum. ²³¿Chucoch mi la caq'uentel laj cuxtilel che' macal lac bijlel? Lon cuxulonla, joy ñet'elonla yubil i cha'an Dios. ²⁴Che' comix c'ux c waj, mach mejlicon cha'an jesuñayon. Che' comix c cha'len t'an, muc'on jach ti ajcan. ²⁵Jini wocol tsa' ba c bac'ña tsi' tajayon. Wolix c p'ulben wocol yic'ot baq'uen. ²⁶Che' yaxalix co, che' wolic wen cantan c ba, tsi' tajayon wocol. Tsa' ujti ti t'an Job.

Elifaz tsi' tiq'ui Job

4 Tsa' caji ti t'an Elifaz, jini ch'oyol ba ti Teman. Tsi' yala: ²¿Ch'ijiyem ba mi caj a wubin mi tsac pejcayet? Wersa com c cha'len t'an. Mach mejlic c tic' c ba. ³Ti yamba ora jatet

tsa' cantesa cablob. Tsa' p'atesabeyob i c'ab jini c'uña' bλ. ⁴Ti a t'an tsa' colta ti wa'tal jini wolix bλ ti yajlel. Tsa' ch'ejl'esa jini mach bλ wenic i pix. ⁵Wale tsa'ix tili wocol ti a tojlel. Mach kujchic a cha'an. Woli' tajet wocol. Ch'ijiyem a pusic'al. ⁶Wale che' an a wocol, ¿mach ba anic a pijtaya ti Dios? Dios mi' cantan jini tojo' bλ. ¿Mach ba yomic ma' chλn ñop Dios ti' xuctilel a pusic'al? ⁷Yom ma' wen ña'tan, ma'anic mi' lon jilel jini toj bλ mi juntiquilic. ¿A caña bλ juntiquil toj bλ tsa' bλ chojqui ti wocol? ⁸Cujil chuqui tac mi lac pac' mi lac wersa c'aj. Jini mu' bλ i pac'ob jontolil, mu' bλ i cha'leñob tic'laya, jini jach mi caj i c'ajob. ⁹Dios mi' ya'leñob. Jini cha'an mi' jilelob. Lajal i t'an bajche' p'atλ bλ ic' mu' bλ i jisañob. ¹⁰Dios mi' tic'ben i t'an bajlum yujil bλ jontolil. Mi' c'asben i baquel i yej i yal bajlum. ¹¹Mi' chλmel ti wi'ñal tat bajlum yic'ot ña' bajlum. Mi' pam pujquel i yal.

¹²⁻¹³An chuqui tsa cubi ti mucul. Tsa' caji c ñich'tan che' wen wλylob c pi'lob. An chuqui tsa' caji j q'uel, che' cañal to c wut woliyon ti tsic pusic'al. ¹⁴Tsa' cajiyon ti baq'uen. Tsiltilña c bac'tal. ¹⁵⁻¹⁶Che' bajche' an chuqui wa'al tic tojlel tsa cubi, pero ma'anic tsiquil tsaj q'uele. Tsi' wejclubeyon c wut che' bajche' ic'. Mulucña c pachilel. Ñach'alon tsa cubibe i t'an. ¹⁷¿Am ba toj bλ winic ti' tojlel Dios? ¿Am ba sac bλ winic ti' tojlel xMel winicob? ¹⁸Dios ma'anic tsa' mejli i yac' ti ñuc ti' pusic'al jini ángelob. Tsi' tajayob ti mulil jini x'e'telob i cha'an. ¹⁹¿Mach ba ñumen anic i mul winicob? Melbilob i bac'tal yic'ot i ts'ubeñal lum. Lajal mi' jejmelob che' bajche' i c'u' mut. ²⁰Ti sac'an c'oc'ob to, ti ic'an ma'añobix. Mi bac' chλmelob, ma'anix mi' cha' sujtelob, pero ma'anic majqui mi' p'is ti' wenta. ²¹Ti ora mi' chλmelob che' maxto anic i ña'tibal.

5 C'ajtin a coltanel ti wocol t'an. Q'uele mi an majqui mi caj i jac'. ¿Am ba juntiquil ch'ujul bλ mu' bλ mejlel i coltañet? ²Jini tonto bλ mi' bajñel tsansan i bλ ti mich'ajel. Jini mu' bλ i lon mich'len i pi'lob cha'an tsaytsayña i pusic'al mi' bajñel jisan i bλ. ³Jini mu' bλ i cayob Dios tic'al mi poj jumuc' mi' tajob chuqui yomob, pero mi' bac' tilel wocol i jisañob. ⁴P'ump'un mi' cλytllob i yalobilob. Mi' tic'lantelob. Ma'anic majqui mi' p'untañob. ⁵Mi' xujch'ibentelob i c'ajbal. Yaño' bλ mi' c'uxob. Mi' jisabeñob i taq'uin. ⁶Mach tilemic ti lum lac wocol. Ti' caj i mul winicob mi' tajob wocol cha'an woli' c'ajob

chuqui tac jach tsi' pʌc'ʌyob. 7I tilel mi' lejmel c'ajc che' tsuc'bil. I tilel mi' tajob wocol winicob c'ʌʌʌ che' ʌʌlob to.

8Muq'ueic c taj wocol che' bajche' jatet, mic ʌʌclan Dios. Mic junyajlel ac' c ʌʌ ti' wenta. 9Wen yujil i melol chuqui tac ñuc yic'ot chuqui tac uts'at. Ma'anix i p'isol i ñuclel, wen ñuc tac i ye'tel. 10Mi' choc tilel ja'al cha'an mi' yʌch'esan jini lum. 11Mi' coltan jini utso' ʌʌ i pusic'al yic'ot p'ump'ußo' ʌʌ. Mi' pʌyob loq'uel ti wocol cha'an mi' yʌq'ueñob tijicña ʌʌ. 12Mi' mʌctan jini jontolo' ʌʌ che' an chuqui woli' ña'tañob i mel. 13Mi' yʌc'ob ti chujquel ya' ti yac mu' ʌʌ i lon chajpañob cha'an mi' chucob yambʌ i pi'ʌʌ. Mi' jembeñob i pensar che' an chuqui leco mi' lon ña'tañob i mel. 14Ti q'uiñil mi' cha'leñob xʌmbal ti ic'ch'ipan ʌʌ pañimil. Lajlajña mi' majlelob yilal che' bajche' xpots'. Lajal jach mi' melob ti q'uiñil che' bajche' ti ac'ʌlel. Mach yujilobic bajche' mi caj i yujtel i ye'tel. 15Dios mi' coltan meba' ʌʌlob yic'ot p'ump'ußo' ʌʌ cha'an mi' loq'uelob ti' c'ʌb jini woli ʌʌ i tic'lañob. 16Che' jini xuc'ul mi caj i tajob tijicña ʌʌ. Pero mi caj i jilel i p'ʌʌlel jini yujil ʌʌ jisaya.

17Tijicñayonla che' toj'esʌbilonla cha'an lac Yum. Jini cha'an mach ma' ts'a'len lac Yum che' mi' ju'ʌbeñet a pusic'al ti wocol. 18Wocol mi la cubin che' mi' lowonla Dios, pero mi caj i pixbeñonla lac lojwel cha'an mi lac cha' lajmel. 19Ma'anic mi caj a wajq'uel ti jilel anquese mi' cʌʌx tajet wocol. Jujunyajl mi caj i coltañet loq'uel. 20Mi caj i cʌntañet che' ti' yorajlel wi'ñal ame chʌmiquet. Mi caj i cʌntañet che' ti' yorajlel guerra ame jejq'uiquet ti espada. 21Mi caj i cʌntañet che' mi' pʌq'uetob ti mulil. Mach a ʌʌc'ñan jini wocol mu' ʌʌ caj i tilel. 22Anquese mi' p'ojlel guerra yic'ot wi'ñal mux caj a cha'len tse'ñal, come ma'anic chuqui mi caj i tumbenet. Che jach mi caj i ñusañet jini jontol ʌʌ ʌʌte'el. 23Anquese wen jontol, uts mi caj i c'axel ti a t'ejl. Jini pañimil ja'el mi caj i pasbeñet i yutsllel. 24Ma'anic chuqui mi caj a ʌʌc'ñan. Ma'anic majqui mi caj i tic'lan a wotot che' an ba' ma' majlel. Ma'anic majqui mi caj i xujch'ibeñet a wʌlac' mi i ʌʌlic a ñʌc' lotol ʌʌ a cha'an. 25Mi caj i q'uejlelob ti ñuc a walobilob. Mi caj i p'ojlelob che' bajche' jam. 26Che' bajche' mi' cujchel tilel ixim ba' mi' lajt'el ti' yorajlel c'ajbal, che'ʌch mi caj a tilel ti mucuñibʌʌ che' wen ñoxetix. 27Cujil isujm ili woli ʌʌ c subeñet. Mi a wom a taj tijicña ʌʌ, jac'beñon c t'an, che'en Elifaz.

Job tsi' tiq'ui i cañayo' ba

6 ¹⁻²Tsa' caji ti t'an Job: La' ajq'ueic ti balanza pejtél c wocol yic'ot c ch'ijiyemlel. ³Come wen alatax. Ñumen ti p'isol bajche' pejtél jini ji' am ba ti' ti' colem ñajb. Jini cha'an całax jax tsac cha'le t'an. ⁴Come lac Yum tsi' juluyon ti' te'el i jalajb yubil. Tsa' wen ochi tic pusic'al i ñi' te' bombil ba ti veneno. Dios mi' p'ojlesan wocol tic tojlel. Mi' tempán bałbaq'uen ba cha'an mi' jisañon. ⁵Ch'ijiyem mi' cha'len oñel jini tat wacax che' ma'anic i buc'bal. Jini burro mach ba anix i yum mi' cha'len uq'uel che' ma'anix jam. ⁶Che' ja'el winicob mi' cajelob ti a'leya che' sup i bał i ñac'. Wersa yom i yałts'mil i saquel tumut. Machiqui la com lac xejtan che' mi lac mac'. ⁷Wersa wolij c'ux jini tsa' ba c ts'a'le ti ñaxan.

⁸⁻⁹Ti pejtelel c pusic'al com mi' jac'beñon c Yum cha'an jini woli ba j c'ajtiben. Com mi' yaç'on ti chamel cha'an mic loq'uel ba' tsats chuculon ti wocol. ¹⁰Anquese cabal c wocol, tijicña c pusic'al cha'an ma'anic tsac ts'a'libe i t'an jini ch'ujul ba Dios. ¹¹¿Chucoch anto j cuxtilel che' comix chamel? Mach chan cujchix c cha'an wocol mi jal to mic chamel. ¹²Mach lajalonic bajche' xajlel mach ba mi' yubin wocol. Mach lajalic c bac'tal bajche' tsucu taq'uin. ¹³Come ma'anix c p'atalel mi ts'ita'ix. Ma'anic j coltanel. Ma'anix chuba mic pijtan.

¹⁴Jini mach ba anic mi' p'untan i cañā ba wolix ba ti jujuc chamel ma'anic mi' bac'ñan lac Yum. ¹⁵Quermanujob, lajaletla bajche' pa' mu' ba i wajlen jini am ba i tiquin ti'. ¹⁶Mi' bujt'el pa' che' ti' yorajlel tsañal, ¹⁷pero ti' yorajlel ticwal mi' tiquin. ¹⁸Jini xñumelob mi' c'ayob bij cha'an mi' tajob ja', pero lolom jach mi' saclañob. Mi' sajtelob cha'an tiquin ti'. ¹⁹Che' talob i japob ja' jini ch'oyolo' ba ti Temán yic'ot ti Sabá, ma'anic chuqui mi' tajob. ²⁰⁻²¹Che'ach añon ti la' tojlel bajche' jini am ba i tiquin ti'. Mach c tajayic chuqui tsac pijta. Ma'anic mi la' ñuq'uesabeñon c pusic'al. Mi la' sutq'uin la' ba cha'an baq'uen. Ma'anic mi la' coltañon. ²²¿Tsa' ba j c'ajtibeyetla c majtan? ¿Tsa' ba c subeyetla cha'an mi la' waq'uen Dios i majtan loq'uem ba ti a walac' cha'an mi' lajmesañonla? ²³Ma'anic tsaj c'ajtibeyetla j coltanel cha'an mij coel ti' c'ab xtic'laya. Ma'anic tsac subeyetla: Mañayon loq'uel ti' c'ab jini motol ba xujch'ob. Ma'anic, cho'on. ²⁴Cantesañon. Ñach'alon

wolic ñich'tañetla. ¿Baqui an c sajtemal? PAsbeñon. ²⁵I t'an jini toj ba wen yujil jec'ol. Pero ¿baqui an c mul? Lolom jach mi la' wa'leñon. ²⁶¿Yom ba mi la' socbeñon c t'an cha'an mi la' junyajlel chilbeñon c pijtaya? ²⁷Lajaletla bajche' jini mu' ba i tic'lañob meba' alallob. Lajaletla bajche' winicob mu' ba i ñopob i chon ti jubem ba i tojol jini amigo i cha'an. ²⁸Wale q'ueleyon. Subeñon mi woliyon ti lot. ²⁹La' wolic, mele la' pusic'al. Cha'lenla meloñel ti toj. Cha' ña'tanla c t'an. Ma'anic c mul. ³⁰¿Mach ba tojic c t'an? ¿Mach ba cujilic chuqui toj?

Job tsi' letsa i t'an ti' contra Dios

7 ¿Mach ba cabalic mi laj cuch wocol ti pañimil? Mi' joloñel laj q'uiñilel che' bajche' i q'uin x'e'telob mu' ba i ch'Amob i tojol. ²Jal mic pijtan cha'an mi' bajlel majlel q'uin. Lajalon bajche' x'e'tel jal ba mi' pijtan i tojol cha'an i ye'tel. ³Cabalix uw woliy cuch wocol. Ti jujump'ejl q'uin wocol mic ñusan ac'lalel. ⁴Che' mic ñolta, wocol mic pijtan i yorajlel ch'ojyel. Cabal mic ñijcan c ba cha'an c'ux c bac'tal. Jal mi' sac'an. ⁵Bibi'on, mi' p'ojlel motso' tic pachilel. Sit'il c pachilel c'lalal mi' cha' cajel ti loq'uel i pujwil. ⁶Jumuc' jach woliyon ti ñumel ti pañimil. Ora jax mi' ñumel q'uin tac che' bajche' i jaloñib jini wen yujil ba jalbal. Wolic ñox'an. ¿Chuqui to mic chan pijtan ti pañimil?

⁷Ña'tan, lajal j cuxtilel bajche' junjajts' ic'. Ma'anix mi caj c taj tijicña ba. ⁸Jini mu' ba i q'uelon wale mach sujtitx i cha' q'uelon. Mi caj a cha' ña'tan a q'uelon, pero ma'anix tsiquilon. ⁹Che' bajche' tocal mu' ba i lon julel ma'anix tsiquil, che' ja'el jini mu' ba i jubel ti' yajñib chameño' ba ma'anic mi' cha' tilel. ¹⁰Mach chan sujtitx ti' yotot. Mach i q'ueleyobix jini año' ba ti' yotot.

¹¹Jini cha'an ma'anic mic tic' c t'an. Mic cha'len t'an cha'an ch'ijiyem c pusic'al. Mach cujchix c cha'an ili wocol. Mi' yochel i ch'ajel tic pusic'al. ¹²¿Lajalon ba bajche' colem ñajb? ¿Lajalon ba bajche' jontol ba chay yujil ba jisaya mu' ba a wersa tic'? ¹³⁻¹⁴Che' comix wayel cha'an mi' ts'ita' ñajayel c cha'an wocol, ma' bac'tesañon ti ñajal. Che' comix c'aj co tic wayib, ma' wlaq'ueñon j q'uel babaq'uen tac ba. ¹⁵Ñumen uts'at mi tsa' jujch'iyon. Ñumen uts'at mi tsa' chamiyon cha'an mi' junyajlel lajmel c tic'lantel. ¹⁶C'ojyemonix. Mach comic jalijel

ti pejtelel ora. La' ajñicon tic bajñel, come ma'anix c cha'an cabal q'uin. ¹⁷¿Am ba i c'ajñibal winic cha'an ma' q'uel ti ñuc? ¿Chucoch ma' p'is ti wenta? ¹⁸Ma' q'uelon ti jujump'ejl q'uin. Ma' wilabeñon c pusic'al jujump'ejl ora. ¹⁹¿Baqui to ora mi caj a poj cayon tic bajñelil cha'an mic choc c tujb? ²⁰Jatet ma' q'uel pejtel winicob. Mi tsac cha'le mulil, ¿chuqui c mul? ¿Chuqui tsac tumbeyet? ¿Chucoch tsa' yajcayon cha'an ma' julon ti jalajb? Mic lon p'ojlesabeñet a we'tel. ²¹Yom ma' ju'sabeñon c pusic'al mi wolic chañ'esan c ba. Ñusabeñon c mul. Pocoyon. Come mach jalix mi caj c chamel. Che' ma' tilel a tajon ma'añonix. Che' tsi' yala Job.

Bildad tsi' subu toj Dios

8 Tsa' caji ti t'an Bildad ch'oyol ba ti Suha. ²¿Jala to mi caj a chan cha'len t'an che' bajche' jini? Lajal a t'an bajche' ic'. ³¿Mu' ba caj i ts'ot i bijlel Dios? ¿Mach ba tojic mi' cha'len meloñel ti pejtelel ora? ⁴Che' ba tsi' cha'leyob mulil la walobilob ti' tojlel Dios, tsi' yaq'ueyob i toj i mul. ⁵Jini cha'an yom ma' bax'an cha'an ma' saclan Dios. C'ajtiben i yutslel i pusic'al jini Mach ba Anic I P'isol I P'atalel. ⁶Che' jini che' saquet, che' tojet ja'el, mux i tilel i tajet. Mux i cha' aq'ueñet i tijicñayel a pusic'al ti a wotot. ⁷Anquese ts'ita' jach a chub'an che' ti ñaxan, Dios mi caj i p'ojlesabeñet che' ti wi'il.

⁸C'ajtesan i cantesabal a tatob año' ba ti oñiyi. Cabal i ña'tabal ajñel. Ti' tojlel lac tat maxto anic lac pusic'al. ⁹Poj ac'bi yilal tsa' laj q'uele pañimil. Lajalonla bajche' axñal mu' ba i puts'el. Che'ach mi lac ñumel ti pañimil. ¹⁰An cabal i pusic'al lac ñojte'el. Wen yujilob cantesa.

¹¹¿Yujil ba coel jam ti tiquin lum? ¿Mach ba anic mi' coel ba' ach' jini lum? ¹²Ya' ba' woli' coel mi' bac' tiquin i yopol che' ma'anic mi' taj ja'. ¹³Lajal jini winic mu' ba i cay Dios. Mach i tajayic chuqui mi' pijtan. ¹⁴Mach p'atalic come ma'anic i xuc'tilel i pusic'al. Lajal i c'unlel bajche' i jalbal am. ¹⁵Jini winic mu' ba i cay Dios mi' lon ña'tan xuc'ul i yotot, pero mi' caj ti yajlel. Che' mi' ñactan pajc', mi' caj ti jejmél. ¹⁶Lajalach winic bajche' ac' mu' ba i pam coel ti corral. ¹⁷Chucul i wi' ti' jajp ts'alal ba xajlel. ¹⁸Che' mi' bojquel ya' ba' chucul, mach chan tsiquilix i yajñib ba' tsa' coli. ¹⁹Ya' ba' tsa' poj coli mux i pasel pimel.

²⁰Ña'tan che' jini Dios ma'anic mi' choc loq'uel jini toj ba. Ma'anic mi' cɔy i mactan jini jontolo' ba. ²¹Mu' to caj i yaq'uet ti tse'ñal yic'ot tijicña ba. Mi caj a cha'len t'an ti' tijicñayel a pusic'al. ²²Mux i yubiñob quisin jini mu' ba i ts'a'leñetob. Mi' caj ti jilel i yotot jini xjontolil. Che' tsi' yɔɔɔ Bildad. Tsa' ujti ti t'an.

Job ma'anic tsa' mejli i jac' Dios

9 ¹⁻²Job tsa' caji' jac'. Isujmach jini woli ba a wɔɔ. Cujilix. Pero ¿bajche' mi caj i q'uejlel ti toj winic ti' tojlel Dios? ³Mi yom Dios i tech t'an yic'ot winic, ¿yujil ba i jac'ol jini winic? Mach yujilic i jac'ol mi junyajlic anquese jal mi' chan pejcantel. ⁴Come wen cabal i pusic'al Dios, wen cabal i p'ɔɔɔɔ. Ti pejtelel ora ma'anic mi juntiquilic tsa' ba i contraji tsa' ba mɔɔɔ i cha'an. ⁵Dios mi' bac' ñijcan colem wits. Ma'anic mi' wan subeñonla. Mi' ñucchocon ti' mich'ajel. ⁶Ya' ba' buchul pañimil mi' ñijcuyel. ⁷Ma'anic mi' pasel q'uin mi ec' mi tsi' tiq'ui Dios. ⁸I bajñel tsi' lich'i panchan. Tsi' xɔɔɔ majlel colem ja'. ⁹Tsi' mele jini ñoj ec' i c'aba' Osa Mayor yic'ot Orión yic'ot jini wucp'ejl ec' i c'aba' Xɔɔɔɔ, yic'ot jini jochol ba panchan ti sur ba' ma'anic tsiquil ec'. ¹⁰Mi' mel ñuc tac ba mach ba cambilic. Mi' toj sajtél lac pusic'al cha'an i melbal mach ba tsicbilic. ¹¹Awilan woli ti ñumel Dios tic tojlel, pero ma'anic mij q'uel. Mi' cha'len xɔɔɔɔ ñumel, pero ma'anic mi quilan. ¹²Che' an chuqui mi' chilbeñonla, ¿majqui mi mejlel i mactan? ¿Majqui mi' lon ña'tan i tic' cha'an jini mu' ba i mel? ¹³Dios mi caj i pas pejtél i mich'lel. Mi caj i ju'sɔɔɔɔ i pusic'al jini chaño' ba yic'ot i pi'ɔɔɔ ti jontolil. ¹⁴Jixcu joñon, mach ch'ejlonic cha'an mic jac'ben. Anquese lon chajpɔɔɔɔ c cha'an c t'an, mi caj c ñɔɔɔɔɔ ti' tojlel. ¹⁵Anquese tojon mach kujilic i jac'ol. Woli jach j c'ajtiben c juez ti wocol t'an cha'an mi' coltañon. ¹⁶Muq'ueic i q'uelon ti toj, ¿bajche' mic ña'tan? Muq'ueic i jac'beñon c t'an, mic lon ña'tan mach isujmic. ¹⁷Come tsa'ix i yaq'ueyon wocol che' bajche' p'ɔɔɔɔ ba ic'. Anquese ma'anic c mul, tsi' p'ojlesɔɔɔɔ c tsoy. ¹⁸Ma'anic mi' poj cɔyon cha'an mij c'aj co. Cabal mi' yaq'ueñon ch'aj ba. ¹⁹Mi woli lac ña'tan i p'ɔɔɔɔɔ, isujm an cabal i p'ɔɔɔɔɔ. Mi woli lac ña'tan meloñel, ¿majqui mi caj i wersa c'ajtiben? ²⁰Tsa'ic cɔ'le tsac taja c mul, anquese ma'anic c mul. Cujil

tojon pero mach tojonic tsa'ic c tiq'ui. ²¹Isujm tojon, pero ma'anic wolic p'is c ba tic wenta. Mach comix jal'an ti pañimil. ²²Jini jachix com c sub. Junlajal mi' q'uelonla Dios. Lajal mi' jisan jini tojo' ba yic'ot jini jontolo' ba. ²³Che' mi' bac' tilel wocol i jisan winicob, lac Yum mu' jach i tse'tan jini mach ba añobic i mul woliyo' ba ti wocol. ²⁴Pejtel año' ba ti pañimil tsa'ix ajq'uiyob ti' wenta jontolo' ba. Dios mi' macbeñob i wut jini juezob. Mach tojic mi' cha'leñob meloñel. Machic i melbal Dios, ¿majqui i melbal che' jini?

²⁵Ti ajñel wolic ñumel ti pañimil che' bajche' caballo yujil ba ajñel. Tsa'ix puts'i c jabilel ti cabal wocol. ²⁶P'is mi' ñumel c jabilel che' bajche' barco ñajt ba mi' cha'len xambal. Wolic majlel che' bajche' xiye' che' mi' jubel i chuc i we'el. ²⁷Mi tsa cala: Ma'anix mi caj c sub c wocol. Mi caj c cha'len wersa cha'an tijicña c wut, lon cho'on. ²⁸Che' jini babaq'uen mi' yasa'el c pusic'al cha'an cabal wocol. Cujil ma'anic mi caj a q'uelon ti toj. ²⁹¿Chucoch mic lon cha'len wersa ti a tojlel mi mach tojonic? ³⁰Mi tsac poco c ba ti yax ba ja', mi tsac poco j c'ab cha'an wen sac, lolom jach. ³¹Mux caj a ts'ajon ti beyoc ja' ba' mic pa'jq'uel ti oc'ol. C pislel mi caj i yac'on ti ts'a'lentel.

³²Mach winiquic Dios bajche' joñon cha'an mic pejcan, cha'an temel mi cochel quic'ot ti melobajal. ³³Ma'anic winic ti' tojlel Dios mu' ba i yac' i ba ti xinlapal cha'an mi' lajmel i mich'ajel Dios tic tojlel. ³⁴La' i tats' i c'ab tic tojlel. Mach i chan bac'tesañon. ³⁵Che' jini mux caj c cha'len t'an ti' ñach'tilel c pusic'al che' lajmenix baq'uen. Mux c suben ma'anic c mul.

Job tsa' c'ojoyi

10 Tsa'ix c'ojoyiyon. Comix chamel. Mux caj c sub pejtel c wocol yic'ot jini ch'aj ba mu' ba cubin. ²Com c suben Dios: Mach a wac'on ti toj mulil. La' c ña'tan chucoch wola' wac'on ti wocol. ³¿I t'ojol ba ti a wut che' ma' tic'lañon, che' ma' ts'a'len jini winic tsa' ba a mele? ¿I t'ojol ba ma' coltan jini jontolo' ba mu' ba i cha'leñob jontolil? ⁴¿Lajal ba ma' cha'len meloñel che' bajche' winicob mach ba anic i ña'tibal? Mach cu lajaletic, come an a ña'tibal. ⁵¿Lajal ba a jabilel bajche' c jabilel lojon? ⁶¿Chucoch ma' wersa saclan c jontolil?

Ma' wersa saclan c mul. ⁷A wujil mach jontolonic. Ma'anic majch mi' coltañon loq'uel ti a c'Ab.

⁸Jatet tsa' meleyon. ¿Mu' ba caj a jisañon? ⁹Ña'tan melbilon ti ts'ubejn. ¿A womix ba a sutq'uiñon ti ts'ubejn? ¿Chuqui wola' tumbenon? Winicob mi' jebob loq'uel lech cha'an mi' melob quesu. ¹⁰¿Mach ba lajalonic ti a c'Ab bajche' lech? ¹¹Tsa' waq'ueyon c pachilel yic'ot c bac'tal. Tsa' ñut'beyon c baquel ya' tic p'aquel. ¹²Tsa' waq'ueyon j cuxtalel. Tsa' cantayon ti' yutslal a pusic'al. ¹³Pero lotol ti a pusic'al pejtel chuqui ña'tibil ba a cha'an. Woli a jisañon che' bajche' tsa' wan ña'ta. Cujil jiñach woli ba a mel tic tojlel.

¹⁴Mi tsac cha'le mulil q'uelel a cha'an. Ma'anic mi caj a ñusabeñon. ¹⁵Mi jontolon p'ump'un c ba, ma'anic j coltantel. Anquese mi tojon wersa mic may c wut ti a tojlel. But'ul c pusic'al ti ic'ch'ipan ba yic'ot quisin. ¹⁶Che' lon comix ch'ojoyel ila ba' añon ti lum, ma' cha' xitchocon jubel che' bajche' bajlum mu' ba i cha' jats' jubel i colojm. Ma' contrañon ti cabal a p'atalel. ¹⁷Ma' chan ac' a t'an cha'an mic taj wocol. Mi' yutsi p'ojlel a mich'lel. Motocña mi' tilel wocol tic tojlel.

¹⁸Mi che'ach mi caj cujtel, ¿chucoch tsa' wac'ayon quilan pañimil? Uts'at tsa'ic chamiyon che' cantabilon to. ¹⁹Che'ic jini mach wa'ic añon wale. Che'ic jini tsa jach bac' mujquiyon che' ba tsi' lotoyon j co'. ²⁰Ma'anix jayp'ejl q'uin c cha'an. A wocolic cayayon cha'an mic poj c'aj co, ²¹jinto mic majlel ba' ma'anix mic chan sujtel. ²²Ya' ba'an ic'ch'ipan pañimil ti pejtelel ora, ya' ba' ma'anic i saclel ti jini lum, mach yulilobic chuqui woli' yujtel. Lajal ti xinq'uinil che' bajche' xin ac'lalel. Mi' yochelob ti axñal pejtel muc'o' ba ti chamel. Tsa' ujti ti t'an Job.

Zofar tsi' jop'be i mul Job

11 ¹⁻²Zofar ch'oyol ba ti Naamat tsa' caji ti t'an: Lajal a t'an bajche' cholocña ba ja'. ¿Mach ba yomic mic tiq'uet lojon? ¿Mu' ba a lon ña'tan a pas a ba ti toj cha'an cabal t'an? ³¿Yom ba mic ñajch'el che' wola' chañ'esan a ba? Che' ma' wajlen Dios, ¿mach ba yomic mi caq'uet lojon ti quisin? ⁴Ma' lon sub a ba ti toj ti' tojlel Dios. ⁵Uts'at muq'uc i pejcañet Dios cha'an mi' subeñet chuqui woli' q'uel ajñel. ⁶Uts'at muq'uc i pasbeñet a ba, come yujil Dios pejtel chuqui

mucul. Che' jini muq'uix a ña'tan anto yom cabal a wocol cha'an mi' ju'sabeñet a pusic'al cha'an pejtet a mul.

⁷Anquese ma' cha'len wersa a ñop chuqui woli' ña'tan i mel Dios, mach mejliquet. ¿Cabal ba a pusic'al cha'an ma' suben Dios bajche' yom mi' mel? ⁸C'Alal ti' chanlel panchan ma'anic i sajtemel Dios mi che'ic to wistal, pero ¿chuqui to a c'ajñibal? Ma'anic i p'isol i ña'tibal Dios, pero jatet, ¿chuqui to a wujil? ⁹Wen ñuc i yEspíritu, ñumen bajche' pañimil yic'ot ñajb. ¹⁰Mi tsa' bac' tili Dios ti meloñel, ¿majqui mi mejlel i tic'? ¹¹Wen yujil bajche' mi' lon ña'tañob jini sajtemo' ba. Mi' q'uelbeñob i jontolil baqui jach mi' melob. ¹²Jini ña' burro mach mejlic i cantan winic. Che' ja'el jini tonto ba winic mach mejlic i taj i ña'tibal Dios.

¹³Muq'uic a chajpan a pusic'al, muq'uic a sats'ben a c'ab ti' tojlel, ¹⁴muq'uic a cay pejtet a mul cha'an mach chlan anix jontolil ti a wotot, ¹⁵che'ic jini mi caj a letsan a wut ti' tojlel ti' ñuclel a pusic'al. Mux i lajmel pejtet a quisin yic'ot baq'uen. ¹⁶Che'ic jini mach chlan c'ajalix a cha'an jini wocol. Muq'uic a chlan ña'tan wocol, lajal jax yubil bajche' ja' tsa' ba ñumi. ¹⁷Che'ic jini wen tsiquil to i c'ac'al a cuxtilet che' bajche' xinq'uiñil to. Che' wolix ti bajlel majlel q'uin che' ñoxetix, che'ach mi caj a q'uel che' bajche' sac'ajel. ¹⁸Xuc'ul mi caj a wajñel, come an chuqui wola' pijtan. Che' ba tsa'ix a lu' q'uele ti a joytilel, muq'uix caj a wayel ti' ñach'tilel a pusic'al. ¹⁹Che' ñololet ma'anic chuqui mi caj i bac'tesañet. Mux i tilelob cabal winicob cha'an mi' c'ajtibeñet i coltanel. ²⁰Jini jontolo' ba mach che'ic mi' caj i yajñelob. Mach i tajayobic ba' mi' c'ajob i yo. Woliyob ti pijt, pero cha'an jach mux caj i chamelob. Tsa' ujtí ti t'an Zofar.

Job tsi' yala an i p'atlel yic'ot i ña'tibal Dios

12 Job tsa' caji ti t'an: ²Jatet jachla an la' pusic'al yubil. Jatet jachla mi la' ña'tan chuqui toj. ³Pero an c pusic'al ja'el lajal bajche' jatetla. Mic ña'tan ja'el chuqui toj. Jini woli ba la' wal mi' pam ña'tintel. ⁴Wale wolix i wajleñonob c pi'lob anquese tojon. Pero ti yamba ora Dios tsi' coltayon che' ba tsaj c'ajtibe j coltanel. ⁵Jini wen chumul ba mach ba cambilic i cha'an wocol mi' ts'a'len jini p'ump'uño' ba. Mi' tse'tan jini mu' ba i yajlelob. ⁶Jini xujch'ob mi' wen

chumtllob cha'an i xujch'. Jini mu' ba i contrajiñob Dios mi' chan cha'leñob bajche' jach yomob i pusic'al. Dios mi' we'sañob, mi' coltañob.

⁷C'ajtibebob jini bate'el mi mach isujmic. Mux i cantesañet. Jini te'lemut mi caj i pasbeñet. ⁸La' i cantesañet jini lum yic'ot i chlayil ja'. ⁹Laj yujilob jiñach i c'ab lac Yum tsa' ba i meleyob. ¹⁰Dios mi' yal'uen i cuxtielel pejtellel cuxul ba. Mi' yal'ueñob i cuxtielel pejtellel winicob. ¹¹Che' bajche' mi' wen can we'el jini quej, che' ja'el c pusic'al mi' wen can chuqui isujm che' mi cubin. ¹²Añob cabal i pusic'al jini ñoxobix ba. Mi' wen ch'ambeñob isujm.

¹³Ch'oyol ti Dios pejtellel lac ña'tibal yic'ot pejtellel lac p'atlel. Cabalach i pusic'al Dios mu' ba i cantesañonla. ¹⁴Che' an chuqui mi' jem, ma'anic majqui mi' cha' mel. Mi tsi' ñup'u winic, ma'anic majqui mi' yac' ti loq'uel. ¹⁵Mi tsi' tiq'ui ja'al, mi' tiquin pejtellel cuxul ba. Che' mi' choc tilel ja'al, mi' bujt'el tac ja'. ¹⁶I bajñel an i ña'tibal yic'ot i p'atlel. Jini sajtemo' ba yic'ot jini tsa' ba i yac'ayob ti sajtel laj añob ti' wenta.

¹⁷Dios mi' yotsan ti tonto juezob yic'ot xcantesajob. ¹⁸Mi' ts'ocbeñob i cadena tac jini p'ump'uño' ba cachbilo' ba cha'an año' ba i ye'tel. Mi' loc'san yumalob ti' ye'tel. ¹⁹Mi' pay majlel jini motomajob pits'ilob i yoc. Mi' xitchocon jini p'atlo' ba. ²⁰Mi' chilbeñob i c'ajñibal jini wen yujilo' ba t'an. Mi' yac' ti asiyelel i ña'tibal jini ñoxobix ba. ²¹Mi' yac' ti ts'a'lelentelel colem yumalob. Mi' chilbeñob i p'atlelel jini p'atlo' ba. ²²I c'ac'al Dios mi' yac' ti sac jilel jini axñal am ba ti' tojlelel jini woli ba ti chamel. ²³Mi' yac' ti p'ojlelel winicob ti chajp ti chajp. Mi' cha' jisañob. Mi' pam pucob. Mi' cha' much'quiñob tilel ti' lum. ²⁴Mi' socben i pensar yumalob, presidentejob yic'ot reyob. Mi' yac'ob ti sajtel ti mate'el ba' ma'anic bij. ²⁵Sajtemob ti ic'h'ipan ba pañimil, mi' lon cha'leñob xambal, come ma'anic i c'ac'al. Tacamechel mi' cha'leñob xambal che' bajche' xyac'ajel.

Job tsi' yala tojach i pusic'al

13 Tsaj q'uele pejtellel jini, tsa cubi. Mic ña'tan isujm. ²Che' bajche' la' wujil, cujil ja'el. An c pusic'al ja'el, cujil cantesa. ³Muq'uic c taj Dios Mach ba Anic i P'isol i P'atlelel, mi cochel ti t'an quic'ot. ⁴Come woli la' socbeñon c t'an,

xlotiyajetla. Lajaletla bajche' sts'acayajob mach ba yujilobic ts'ac. ⁵Uts'at muq'uic la' junyajlel ñajch'el cha'an ma' wac' ti tsictiyel a ña'tibal. ⁶La'ix ubiñon, mux c subeñet chuqui wolic ña'tan. A wocolic ñich'tañon.

⁷¿Chucoch mi la' lon ña'tan a subeñon i t'an Dios che' mach ch'oyolic ti Dios? Woli la' lon otsan la' t'an ti' yej. ⁸Mi la' lon jop'ben i t'an, come mach i winiqueticla. Pero mach uma'ic Dios. Mach yomic i colt'antel ti winicob. ⁹Tsajaletla ame i q'uel chuqui woli la' cha'len. Mach winiquic Dios cha'an mi' lotintel. ¹⁰Mi caj i ju'sabeñet la' pusic'al mi woliyetla ti lot, come woli la' lon ña'tan la' coltan. ¹¹¿Mach ba ba'c'ñ'abibilic Dios cha'an i ñuclel? ¿Chucoch che' jini mi la' mel la' ba ti ñuc? ¹²Ma'anic i c'ajñibal jini tsa' ba la' wala. Che' mi la' tempan t'an cha'an mi la' coltan Dios, lajal la' t'an bajche' i tañil c'ajc. Mux i jilel che' bajche' woch' ba ma'ctijib yujil ba tojp'el.

¹³Ñich'tañon. Anquese mic chamel cha'an c t'an, mi caj c sub. ¹⁴¿Chucoch mi cac' c ba ba' babaq'uen mic chamel cha'an jini c t'an woli ba c subeñet? ¹⁵Anquese mi' tsansañon Dios, mi caj c ñop ti xuc'ul, pero mi caj c sub c ba ti' tojlel che' mi' melon. ¹⁶Cujil mi caj i coltañon Dios cha'an wolic ñop. Mach pa'yic ti Dios jini winic mach ba i ñopoyic. ¹⁷Ubiñon ti jump'ejl a pusic'al. P'isi ti wenta c t'an. ¹⁸Cujil tojon. Cujil mi caj i q'uelon ti toj. ¹⁹¿Majqui mi' contrajin c t'an? Machic isujm c t'an mic ñajch'el. Che'ic jini mic chamel.

²⁰C Dios, mic subeñet an cha'chajp com ba ma' melbeñon. ²¹Awocolic mach a chan tic'lañon. Mach a chan bactesañon. ²²Subeñon tilel ba' añet. Che' jini ti ora mi caj c jac'. La' c pejcañet mi mach a womic a p'ayon. Yom ma' jac'beñon. ²³Subeñon c mul. Coltañon. Pasbeñon c sajtemal. ²⁴¿Chucoch ma' may a ba tic tojlel? Ma' q'uelon ti a contra. ²⁵Lajalon bajche' i yopol te' woli ba i wejlesan ic'. Lajalon bajche' tiquin ba jam mu' ba i c'ascuyel. ¿Chucoch ma' wajñesañon? ²⁶Ma' wotsan ti jun pejtél chuqui tac mi caj a c'an tij contra. Wen ch'aj jini. Ma' cha' ña'tan pejtél c sajtemal che' ch'itoñon to. ²⁷Ma' wotsañon ti cárcel ba' chucul coc ti fierro yubil. Ma' ch'ac' q'uel pejtél c bijlel. Ya' jach jaxal mic majlel ba' tsa' wac'la c mojon. ²⁸Lajalon bajche' xujc'un te' woli ba ti oc'mal. Lajalon bajche' bujcal woli ba ti c'uxtal ti' chañil.

Ma'anic cabal i q'uiñilel winic

14 Ma'anic cabal i q'uiñilel winic ch'oyol ba ti x'ixic. Cabal mi' taj wocol. ²Jumuc' jach poj an i t'ojlawel che' bajche' i nich pimel. Mi' bac' tiquin. Lajalach bajche' i yalxñalal total. Poj jumuc' tsiquil. ³¿Chucoch ma' lon q'uelon che' jini? Ma' wersa palyon ti meloñel ti a tojlel. ⁴Uts'at anic juntiquil toj ba, pero ma'anic. ¿Ch'oyol ba jini sac ba ti jini mach ba sac'quic? ⁵Wan ña'tabil a cha'an jayp'ejl to q'uin ma' waq'ueño i cuxtalal winicob ti jujuntiquilob. Ora tac jax mi' joloñel i q'uiñilel. ⁶Clax a q'uelon jumuc' cha'an mic poj c'aj co ts'ita' che' bajche' tojbil ba x'e'tel che' mi' jolontesan i ye'tel.

⁷Mi tsa' sejq'ui jubel te', mach i jilibalic. An i tajol mi' loq'uel i buts. ⁸⁻⁹Anquese ñoxix i wi' ti lum, anquese wolix ti oc'mal i yebal, mi' loq'uel i buts che' mi' taj ja'. Mi' cha' cajel ti nich. ¹⁰Mach che'ic winic che' mi' chamel. Mi' ñolchocontel, mi' jujch'el. ¿Baqui mi' majlel i ch'ujlel? ¹¹Che' bajche' mi' tiquin pa' ti' yorajlel jajmel, ¹²che' ja'el mi' junyajlel ñoltal winic che' mi' chamel. Mach chan ch'ojyix jinto mi' sac jilel panchan. Ma'anix majch mi' ñijcan ch'ojyel. ¹³Uts'at muq'ueic a mucon yic'ot jini chameño' ba ba' ma'anic c tic'lantel jinto mi' lajmel a mich'ajel. Wan ña'tibil a cha'an baqui ora a wom a cha' palyon. Che' ba tsa'ix tili i yorajlel, cha' palyonix. ¹⁴Che' mic chamel lojon, ¿mu' ba caj c cha' cuxtiyel? Mi che'ach, mi mejlel j cuch wocol c'alal mi' joloñel anquese jal to mi' c'otel i yorajlel. ¹⁵Mi che'ach, mi caj c jac' ba' ora ma' palyon, come ti' yutslel a pusic'al mi caj a c'ajtesan a winic tsa' ba a mele. ¹⁶Pero mach che'ic mi cal, come wola' chaca q'uelon yic'ot pejtél chuqui mic cha'len. Ma'anic ma' wis ñusan c mul. ¹⁷Uts'at tsa'ic a wotsa pejtél c mul ti jump'ejl coxtal ñup'bil ba cha'an mach chan tsiquilix c jontolil.

¹⁸Che' bajche' mi' yejmel wits, che' bajche' mi' ñijcantel loq'uel colem xajlel ti' yajñib, ¹⁹che' bajche' mi' c'unte' yasan xajlel jini ja', mi' cuch majlel lum ja'el, che' ja'el ma' wac' ti jilel winicob yic'ot pejtél i pijtaya. ²⁰Ma' junyajlel jisabeño i p'atalal. Che' jini mi' clyob pañimil. Ma' yalñ'esabeño i wut. Ma' chocob majlel. ²¹Che' mi' tajob i ñuclél i yalobilob, mach yujilic i tatob. Che' mi' peq'uesantelob, ma'anic mi' yilan.

²²I bajñel mi' ñusan wocol. Jini jach wocol mi' yubin yic'ot ch'ijiyem ba i pusic'al. Tsa' ujti ti t'an Job.

Elifaz tsi' cha' tiq'ui Job

15 ¹⁻³Tsa' caji ti t'an Elifaz ch'oyol ba ti Teman: ¿Che'ach ba yom mi' cha'len t'an jini am ba i ña'tibal? ¿Chuqui ma' taj che' ma' p'ojlesan t'an mach ba anic i c'ajñibal? Mu' jach a but' a tajn ti ic'. ⁴Ma'anic wola' bac'ñan Dios. Ma' lon pejcan Dios che' jini. ⁵Come woli jach a muc a mul che' muq'uet ti t'an. Wen a wujil lotiya. ⁶Mach wersajic mic sub a mul. A t'an mu' ba i loq'uel ti a wej mi' tsictesañet.

⁷¿Tsa' ba a q'uele pañimil ñaxan che' maxto anic winic? ¿Wa' ba añet ti pañimil ti oñiyi che' maxto melbilic wits?

⁸¿Tsa' ba i pejcayet Dios che' ba tsi' ña'ta i mel pañimil? ¿Lu' cañal ba a cha'an jini an tac ba ti pañimil? ⁹¿Chuqui a wujil mach ba cujilic lojon? ¿Chuqui tsa' wubi mach ba ubibilic c cha'an lojon? ¹⁰Tic tojlel lojon an ñoxobix ba ja'el, sacobix i jol, ñumeñobix ba i jabilel che' bajche' a tat. ¹¹¿Mach ba ñuquic ti a pusic'al i yutslel Dios? ¿Mach ba a womic a wubin uts ba t'an?

¹²¿Chucoch calax jax ma' cha'len mich'ajel? ¿Chucoch chan ma' pas a ba tic tojlel lojon? ¹³Wola' wac' a ch'ujlel cha'an ma' contrajin Dios che' ma' cha'len t'an che' bajche' jini. ¹⁴Winicon jachla. Mi lac lon ña'tan saconla. X'ixicob jach lac ña'. Mi lac lon ña'tan tojonla. ¹⁵Mach ñuquic ti' pusic'al Dios jini ch'ujulo' ba i cha'an. Mach sacuic jini panchan ti' tojel i wut. ¹⁶Jixcu jatet tuw a tsoy. Ts'a'lebilet ti winicob. ¿Sacuic ba? Che' bajche' mi' chay ja' esponja, che'ach mi' toyet a mul.

¹⁷⁻¹⁸Ñich'tañon. Mi caj j cantesañet. Ma'anic chuqui mi caj c wis muc. Mi caj c subeñet jini q'uelel ba c cha'an. Jiñach ña'tibil ba i cha'an lac tat ti oñiyi. Tsi' cantesayob lac tat tsa' ba aq'uentiyob jini lum ti ñaxan. ¹⁹Jini lum i bajñel cha'añob jach yic'ot i pi'lob. Ma'anic tsa' aq'uentiyob yaño' ba mach ba i pi'lobic.

²⁰Jini xjontolil mi' wersa cha'len tsic pusic'al pejtel i jabilel. Jini mu' ba i bajñel otsan i ba ti yumal mi caj i tic'lantel c'alal mi' chamel. ²¹Pejtel ora woli' yubin t'an mu' ba i bac'tesan. Anquese ñach'al pañimil, tsiltsilña ti baq'uen ame chamic.

²²Mach loq'uix ba' woli' cantan i ba, come yujil talix espada

i jec'. ²³Mi' lon saclan i bal i ñac'. ¿Baqui mi caj i taj? Wolix i lac'tiyel i yorajlel wocol che' mi' cajel ti ochel ti ic'ch'ipan ba pañimil. ²⁴Talix ch'ijiyem ba yic'ot tsic pusic'al. Mi caj i yalq'uen tsiltsilña ba i pusic'al. Lajalach bajche' rey mu' ba caj i chujquel ti guerra. ²⁵Tsi' sats'la i c'ab i contrajin Dios. Tsi' ts'a'le jini mach ba p'isbilib i p'at'alel. ²⁶Tsats tsi' yac'la i bic'. Chucul i cha'an i mactijib, tsi' choco i ba ti' contra Dios.

²⁷Mich' i wut, jujp'en i bac'tal. Tsi' ch'ambeyob i tejclum yaño' ba che' ba tsi' jisayob ti guerra. Tsa' poj chumle ti' yototob. ²⁸Pero mach jalix mi' caj ti jilel yic'ot tejclum. Jochol mi caj i c'aytal i yotot. Mi caj i bac' jejmel. ²⁹Poj jumuc' jach mi' toy i ba. Mach muq'uic i jalijel i chub'lan. Mach muq'uic i p'ojlel. ³⁰Sajtem ti ic'ch'ipan ba pañimil. Mux caj i tiquin i wi' ti c'ajc. Che'ach i t'ojlawel che' bajche' i nich pimel mu' ba i wejlan majlel ic'. ³¹Mi' lon ñop jini lolom ba, come chan i pusic'al. Lolom jach pejtel i ye'tel. ³²Muq'uix i seb jilel che' maxto i yorajlelic. Mach majlic i cha'an. ³³Lajalach bajche' ac' mu' ba i yasan i yojl, che' bajche' olivote' mu' ba i choc i nich. ³⁴Che'ach añob jini mach ba anic mi' c'uxbiñob Dios. Ma'anic mi' yac'ob i wut. Anquese ch'albil i yotot ti majtañal tsa' ba i ch'amayob ti mucul, mi' caj ti jisantel. ³⁵Jini jach mi' techob jontolil. Mi' p'ojlesaño' wocol. Wen yujilob lotiya ti' pusic'al. Tsa' ujtí ti t'an Elifaz.

Job woli' ti ajcan cha'an i melbal Dios

16 ¹⁻²Tsi' yala Job: Jini woli ba a wal tsa'ix cubi ti yamba ora. Ma'anic ma' wis coltañon. Ma' p'ojlesan c wocol. ³Lolom jach ma' chan pejcañon. ¿Chucoch chan ch'ejet ti t'an? ⁴C'oqu'uicon che' c'amet, ma'anic tsac tic'layet tic t'an che' bajche' wola' tic'lañon. ⁵Tsac ña'ta bajche' yom mic pejcañet cha'an mic ñuq'uesan a pusic'al cha'an cha' tijicñayet.

⁶Che' muc'on ti t'an, ma'anic mi' lajmel c ch'ijiyemlel. Che' ñalach'alon, mach lajmic ja'el. ⁷Isujm tsi' chilbeyon c p'at'alel Dios. Tsi' yac'ayob ti pam pujquel jini año' ba ti cotot. ⁸Tsi' yañal c wut, yajyajonix. Cha'an ti' caj c mul, mi' lon alob. ⁹Dios mi' ts'a'leñon. Mi' jisañon ti' mich'lel. Mi' ñich' pasbeñon i baquel i yej. J contrajob ja'el mi' chaca q'ueloñob. ¹⁰Yomob i jisañon ti' yej. Mi' jats'oñob tic wut. Mi' tempañob i ba tij contra. ¹¹Dios tsi' c'ayayon ti' wenta jini mach ba yujilobic

p'untaya. Woli' yac'on ti' c'ab jini mach ba anic mi' bac'ñañob Dios. ¹²Che' tijicñayon ti cotot tsi' bac' jisayon. Tsi' chucbeyon c bic'. Tsi' chocoyon jubel. Tsi' wa'chocoyon cha'an mi' julon ti' te'el i jalajb. ¹³Tsi' joy ñet'eyon i te'el yilal. Tsi' jeq'ueyon tic pusic'al. Ma'anic tsi' p'untayon. Ach'ix jini lum cha'an c pujwil. ¹⁴Ma'anic tsi' caya i lowon. Ti ajñel tsa' tili i t'uchtañon che' bajche' xguerra. ¹⁵Lapal c cha'an coxtal i wenta c bujc. Tsaj caya c pijtan j coltantel. ¹⁶Chachac c wut ti cabal uq'uel. Tam yoch'anix c wut cha'an mach jalix muc'on ti chamel. ¹⁷Pero mach cha'anic c mul, come sacon. Sacach coración ja'el.

¹⁸Ubi lum, mach ma' muc c ch'ich'el. La' i cha'len t'an jini lum cha'an tojon. ¹⁹Jini woli ba i q'uelon an ti panchan. Jini caj Pejcaya an ti chan. ²⁰J cañayo' ba mi' ts'a'leñoñob, pero Dios mi' p'untañon che' mi' q'uel i ya'lel c wut. ²¹Uts'at muq'uic i ñich'tabeñon c t'an che' bajche' winicob mi' ñich'tabeñob i t'an i p'alob paybilo' ba cha'an mi' melob i ba ti' tojlel Dios, ²²come mach jalix mux caj c xan majlel jini bij ba' mach sujtion.

17 Mach c tajayix chuqui wen. Tsa'ix ts'actiyi j q'uiñilel. Wolix ti jajmel c mucoñib. ²Joy wa'alob xwajleyajob. Woliyob ti a'leya. Tsatsob i pusic'al. ³¿Mach ba anic juntiquil xuc'ul ba quic'ot yom ba i yac'ueñon i c'ab? ⁴Jatet c Dios tsa'ix a ñup'beyob i pusic'al ame i ch'ambeñob isujm. Mach muq'uic i majlel i cha'añob. ⁵P'ump'uñob i yalobilob jini winic mu' ba i p'aj i cañayo' ba. Mi caj i yubiñob wi'ñal.

⁶Dios tsi' yac'ayon ti wajlentel cha'an winicob. Mi' tujbañob c wut. ⁷Mach c'otix c wut cha'an ch'ijiyem ba. Lajal c bac'tal bajche' axñal. ⁸Mi' toj sajtelob i pusic'al jini yujilo' ba p'untaya che' mi' q'ueloñob. Ti wi'il ba q'uin mi caj i majlel i cha'an jini tojo' ba. Mi' cajelob ti quisin jini mach ba tojobic. ⁹Ma'anic mi' xoy i bijlel jini toj ba. Mi' yutsi p'ojlel i p'atlel jini mach ba anic i mul. ¹⁰Jixcu jatetla ña'tanla ti pejteletla. Ma'anic mic taj mi juntiquilic ti la' tojlel am ba i pusic'al. ¹¹Mach c tajayix chuqui wen. Ma'anix c pijtaya. Mach c tajayix chuqui yom c pusic'al. ¹²Mi' lon subob saquix pañimil che' ac'alel to. ¹³Mach jalix mi caj cochel ti lum che' bajche' ti cotot. Mi tsac pejca tic chumlib c mucoñib, mi tsac tajsí c wayib ti ic'h'ipan ba pañimil, ¹⁴mi tsac pejca tic tat i yajñib chameño' ba, mi tsac pejca tic ña' yic'ot quiyti'an jini motso'

año' ba ti lum, ¹⁵ ¿mu' ba caj i coltañon? ¿Chuqui c pijtaya? ¹⁶ ¿An ba c pi'la ya' ba' mic majlel ti mucoñibal? ¿Temel ba mic jubel lojon ochel ti' tsubeñal lum? Tsa' ujtí ti t'an Job.

Jini jontolo' ba mi caj i tojob i mul

18 ¹⁻² Tsa' caji ti t'an Bildad ch'oyol ba ti Suha: ¿Jayp'ejl to ora ma' lon ña'tan a yalcon lojon ti a t'an? ¿Maxto ba anic a pusic'al? Subu a ba mi a wom mic jac'. ³ ¿Lajal ba ma' q'uelon lojon bajche' wacax mach ba anic i pusic'al? ⁴ Wola' tic'lan a ba cha'an mich'et. ¿A wom ba mi' laj chamelob winicob ti' caj a mul? ¿A wom ba mi' c'ajlel tac xajlel ti' yajñib cha'an ma' q'uejlel ti toj?

⁵ Mi' caj ti jilel i wenlel jini jontolo' ba. Mi' caj ti junyajlel yajpel i c'ac'al ba' mi' q'uixñesañob i ba. ⁶ Mi' caj ti jilel i yotot tac jini jontolo' ba ti ic'ch'ipan ba. ⁷ Jini xjontolil mi' caj ti xambal che' bajche' xyac'ajel. Mi' caj ti yajlel cha'an tsi' ñusa t'an. I mul mi' yac' ti yajlel. ⁸ Bajach i ba mi caj i yochel ti yac. Ti ajñel mi' choc i ba ti' ch'eñal lum. ⁹ Mi' ñejt'el i tun'oc ti yac. Chucul calem ba' mach mejlic ti loq'uel. ¹⁰ Mucbil ti lum an lazo mu' ba caj i jich'. Mucbil ti' bijlel an yac mu' ba caj i ñup'. ¹¹ Ya' ti' pat yic'ot ti' tojel i wut yic'ot ti' t'ejl an babaq'uen ba. Ti ajñel mi' majlel ame chujquic i yoc.

¹² Jini wocol woli' pijtan. Muq'uix i jisan ti ora che' mi' yochel i yoc. ¹³ Anix i chamel i pachilel. Mi' wala ac' ti jilel i c'ab i yoc. P'ump'unix mi' chamel. ¹⁴ Mi caj i wersa pajyel loq'uel ti' yotot ba' yom clytal. Ya' ba' babaq'uen jax mi' chamel mi caj i wersa pajyel majlel. ¹⁵ Ma'anix mi' wis clytal i chub'an ti' yotot mi ts'ita'ic. Mi' pulel i yotot che' bajche' mujlabil ti azufre. ¹⁶ Lajal che' bajche' te' mi' chamel. Tiquinix i wi' ti yebal. Tiquinix i yopol ti pam.

¹⁷ Ma'anix majqui mi' chan c'ajtesan ti pañimil. Ma'anix mi' pejcantel i c'aba ti bij. ¹⁸ Mi' chojquel loq'uel ti' saclel pañimil. Mi' yochel ti ic'ch'ipan ba. Ti ajñel mi' chojquel loq'uel ti' tojlel winicob ti pañimil. ¹⁹ Ma'anix i yalobil mi i but. Jochol mi' clytal i yotot. ²⁰ Mi' toj sajtel i pusic'al jini ñoxobix ba che' mi' q'uelob. Mi' cajelob ti baq'uen jini ch'itoñob. ²¹ Lajal mi caj i yujtel i chumlib pejtel winicob mach ba anic mi' bac'ñañob Dios. Junlajal mi' cajelob ti jilel. Tsa' ujtí ti t'an Bildad.

Dios mi caj i tsictesan tojach Job

19 ¹⁻²Job tsa' caji ti t'an: ¿Jala to ba ma' tic'lañon? Ma' ju'sañon ti a t'an. ³Lujunyajlix tsa' wajleyon. Mach a wujilic quisin che' ma' p'ac'on ti mulil. ⁴Mi an c sajtemal maxto anic tsa' tsictesa. ⁵Chan ma' pas a ba tic tojlel che' ma' wa'leñon cha'an c wocol. ⁶Ña'tan Diosach tsa' ba i chocoyon jubel. Tsi' chucuyon che' bajche' chimo' chay. ⁷Mic cha'len oñel cha'an chuculon ti wocol. Ma'anic majqui mi' p'is ti wenta. Mic cha'len t'an cha'an com j coltantel, pero ma'anic xmeloñel mu' ba i melon.

⁸Mactabil c bijlel. Tsats ñet'el jax ba' añon ti ic'ch'ipan ba pañimil. ⁹Dios tsi' jisabeyon c ñuclel ti' tojlel winicob. Tsi' jochbeyon jini corona am ba tic jol yilal. ¹⁰Tsi' laj jisabeyon c chuba'an yic'ot c wersa. Tsi' chocoyon jubel ba' ma'anic j coltantel. Tsi' yac'la ti jilel c pijtaya che' bajche' mi lac boc te'. ¹¹Woli' wen cha'len mich' tic tojlel. Mi' lon q'uelon ti' contra. ¹²Motocña mi' tilelob i winicob i contrajiñon. Mi' joyoñob ba' chumulon.

¹³Tsi' ñajti choco majlel c ascun yic'ot quijts'in yic'ot j cañayo' ba. Mach i cañayoñobix. ¹⁴Chaybilon i cha'an c pi'lob yic'ot j cañayo' ba. Tsa' ñajayiyon i cha'añob. ¹⁵Jini chumulo' ba ti cotot, c winicob yic'ot xch'oc ba x'e'telob, mi' ñajti q'ueloñob. Mach i cañayoñobix yubil. ¹⁶Mic pay c winic. Mach talic. Mij c'ajtiben ti wocol t'an. ¹⁷Mach yomic i ñochtañon quijñam, come tuw i yiq'uilel quej. Leco mi' q'ueloñob quijts'iñob cha'an i tsoyel c bac'tal. ¹⁸Ch'itoñob ja'el mi' ts'a'leñoñob. Che' mic loq'uel mi' bi'leñoñob. ¹⁹Mi' xoyob i bij jini j cañayo' ba ame i tajoñob. Jini c'uxbibilo' ba c cha'an woli' contrajiñoñob.

²⁰Ma'anix c bac'tal. Colelix c chamel. ²¹P'untañon, la' wocolic p'untañon, c pi'lob, come Dios tsi' yac'lyon ti wocol. ²²¿Chucoch mi la' tic'lañon jatetla che' bajche' Dios? ¿Mach ba jasalic woli cubin wocol? ²³Uts'at muq'uic mejlel c ts'ijban c t'an cha'an mi cotsan ti jun. ²⁴Uts'at muq'uic c ts'ijban ti xajlel yic'ot fierro jay ba i ñi'. Yom bujt'ic ti plomo ya' ba' ts'ijbubil cha'an mi' yajñel ti pejtelel ora.

²⁵Cujil cuxul jini tsa' ba i mañayon loq'uel ti' wenta j contra. Jini mi' caj ti wa'tal ti pañimil ti wi'il ba q'uin. ²⁶Cujil che' ba tsa'ix oc'mi c bac'tal mi caj j q'uel Dios anquese ma'anix c

bac'tal. ²⁷Mu'cu caj j q'uel tic wut. Jini jachi, mach yambayic. Mi' ñoj ñuc'an c pusic'al che' mic pijtan. ²⁸Jini cha'an caya la' chan tic'lañon, come mach cha'anic c mul woli cubin wocol. ²⁹Isujm mic subeñetla, tsajaletla ame ajq'uiquetla ti toj mulil cha'an tsa' la' ña'ta la' melon. Ña'tanla muc'ach i meletla Dios. Tsa' ujtí ti t'an Job.

Mi caj i yubiñob wocol jontolo' ba

20 Tsa' caji ti t'an Zofar ch'oyol ba ti Naama. ²Cujil bajche' yom mic jac'beñet. Xic'bilon ti t'an. ³Tsa'ix cubi a t'an che' ba tsa' tiq'uiyon ti t'an cha'an tsa c'ala an a mul, pero ma'anic mi' tic'on ti t'an c pusic'al. ⁴Ña'tan ti isujm, c'ala che' ba tsi' yac'a Dios jini ñaxan ba winic ti pañimil c'ala wale ⁵ma'anic mi' jal'an i ñucel xjontolil. Anquese poj jumuc' mi' maljel i cha'an, mi' bac' jilel i tijicñayel i pusic'al jini mach ba anic mi' bac'ñan Dios. ⁶Anquese wen chan i pusic'al che' bajche' panchan, anquese muc'ach i laj taj chuqui tac yom i pusic'al yubil, ⁷mi' caj ti jilel che' bajche' misujelal. Lajal mi' caj ti jilel che' bajche' i ta'il. Mach i ña'tayobic i pi'lob baqui tsa' majli. ¿Baqui an? lon che'ob. ⁸Mi' cajel ti ñajayel che' bajche' ñajal. Che' bajche' jini q'ueel ba lac cha'an ti ñajal, mach lac chan q'ueleyix ti pejtelel ora. ⁹Mach i cha' q'ueleyobix i pi'lob año' ba ti' yotot. ¹⁰I yalobilob mi caj i c'ajtiñob i coltantel ti' tojlel jini mach ba añobic i chub'an. Mi caj i lu' jisabeñob i chub'an i tat. Mi caj i sutq'uibebob i xujch' i tat. ¹¹Che' ch'iton to mux i yajñel i bac'tal jini winic ti ts'ubejn.

¹²Tsa' ñuc'a i pusic'al cha'an i jontolil ¹³che' bajche' winicob mu' ba i majts'añob jini yacacña ba ti' yej cha'an jal mi' jilel i tsajel. ¹⁴Pero mux caj i bac' paj'an ti' ñac'. Mi' sujtel ti' venenojlel lucum. ¹⁵Mux caj i xejtan i xujch'. Dios mi' yal'uen i xejtan. ¹⁶Mi caj i ñuc' i venenojlel lucum. Mi caj i chamel. ¹⁷Ma'anic mi caj i ñuc'an i pusic'al cha'an i xujch'. Lolom jach i taq'uin. Mach i tajayic lech mi chab. ¹⁸Anquese mi' p'ojlel i taq'uin cha'an i ye'tel, wesa mi' junyajlel cay chuqui tac tsi' ganari. Ma'anic mi' yal'uen i tijicñayel i pusic'al. ¹⁹Come tsi' teñe jini pobrejo' ba. Ma'anic tsi' coltayob. Tsi' chilbeyob i yotot tsa' ba i wa'chocoyob.

²⁰Ma'anic tsi' wis tiq'ui i ba cha'an chuqui yom i pusic'al. Anquese wo'atax i pusic'al, ma'anic chuqui mi' lot. Mi' laj jilel. ²¹Che' ñajix ma'anic i colobal cha'an mi' c'ux ti yamba ora. Mach jal'ac ti wen chumtal ti' tijicñayel i pusic'al. ²²Mi caj i yubin wocol come mach mejlic i coltan i chub'an. Pejtel xjontolilob mi caj i p'ump'un tic'lañob. ²³Che' mi' lon ña'tan jal to mi caj i yubin tijicña ba, Dios mi caj i choc tilel i mich'ajel che' bajche' ja'al. ²⁴Talob ti ajñel mu' ba caj i julob. Che' mi' puts'tan junchajp wocol, mi' lojwel cha'an yamba. ²⁵I te'el jalajb mi caj i sal jec' i bac'tal. Mi' loq'uel i ñi' te' ti' pat ba'an i ch'aj. Mi' cajel ti tsiltsilñayel cha'an baq'uen.

²⁶Che' mi' tam ochel ti ic'ch'ipan ba, ma'anix tsiquil i chub'an. Mi caj i pulel ti c'ajc mach ba ts'abalic ti c'abal, yic'ot pejtel chuqui tac tsa' c'ale ti' yotot. ²⁷Jini panchan mi' tsictesaben i mul. Jini pañimil mi' tejchel ti' contra. ²⁸Mi' caj ti jejmél i yotot yic'ot pejtel i bal. Mi caj i wejts'el majlel che' bajche' but'ja' ti' yorajlel i mich'lel Dios. ²⁹Che'ach mi' caj ti jilel xjontolil. Wan ña'tibil ti Dios chuqui mi caj i tumben jini mach ba anic mi' jac'. Tsa' ujtí ti t'an Zofar.

Poj uts'at mi' yajñelob jontolo' ba

21 ¹⁻²Tsa' caji i yal Job: Ñich'tabeñon c t'an. Ubin jach, mi a wom a ñuq'uesabeñon c pusic'al. ³Asbeñon i yutslel a pusic'al che' woliyon ti t'an. Jinto che' mi cujtel, wajleñon mi a wom. ⁴Cujil jinach Dios mu' ba i yac'on ti wocol. Jini cha'an ch'ijiyemon. ⁵Q'uelela bajche' añon. Cha'lenla baq'uen. La'to sajtic la' pusic'al. ⁶Che' mic ña'tan bajche' añon, mic cha'len baq'uen. Tesuñayon cha'an uq'uel.

⁷¿Chucoch tijicña i pusic'al mi' jal'añob ti pañimil jini jontolo' ba? C'alal c'oc'ob to che' ñoxobix. Añach i ñuclel yic'ot i p'atlel. ⁸Tijicña mi' q'uelob i yalobilob. Wen chumulob che' ñucobix. Tijicñayob i pi'alob yic'ot i p'olbalob. ⁹Añobach i yotot yic'ot i lum. Mach yujilobic baq'uen. Dios ma'anic mi' ju'sabeñon i pusic'al. Ma'anic mi' melob. ¹⁰C'oc'ach i yalac'. Jini tat wacax mi' p'ojlel. Jini ña' wacax ma'anic mi' to'ol ñusan i yal. ¹¹I yalobilob mi' loq'uelob ti alas che' bajche' tiñame'. Jini bic'talob mi' cha'leñob tijp'el, mi' cha'leñob son. ¹²Ñucob i pusic'al cha'an tsinlaw ba taq'uin yic'ot arpa. Tse'tse'ña jax mi' yubiñob jini flauta.

¹³Wen chumulob che' cuxulob to. Ñach'ál i pusic'al mi' chamelob, mi' mujquelob. Mi' subeñob Dios: “La' to bajña ajnicon lojon. ¹⁴Mach comic c ñop lojon a bijlel. ¹⁵¿Majqui jini P'atál ba Mach ba Anic i P'isol i P'atálel? ¿Chucoch yom mic ch'ujutesan lojon? ¿Chuqui mi caj lac taj ti Dios?” che'ob. ¹⁶Pero tilem ti Dios pejtel chuqui mi' taj ti pañimil jini xjontolil. Leco bajche' mi' bajñel ña'tan. Mach che'ic mic ña'tan joñon.

¹⁷Casa mi' bac' yajpel i c'ac'al. Casa mi' bac' tilel wocol ti' tojlelob. ¿Bacan tsiquil mi woli' yubiñob wocol cha'an i mich'lel Dios? ¹⁸¿Mu' ba i chojquel jini winic che' bajche' jam ti ic', che' bajche' misajelal ti sutujt ic'? ¹⁹Mux caj la' jac: “Isujm ma'anic woli' toj jini winic, pero mux caj i tojbeñob i bet i yalobilob”, che'etla. Pero mach che'ic yom. La' i toj ti ts'acal jini am ba i mul. La' i bajñel taj wocol cha'an i mul. ²⁰La' i bajñel ubin jini wocol mu' ba i tilel i jisan. La' i yubin ti ts'acal i mich'ajel Dios Mach ba Anic i P'isol i P'atálel. ²¹Che' yujilix lac'al i yorajlel chamel, mach chan tijicñayix i pusic'al. ²²¿Mejl ba laj cantesan Dios? Diosach mu' ba i melonla. Dios mi' mel ja'el año' ba ti panchan. ²³An winic mu' ba i chamel che' cabal i ñuclel yic'ot cabal i chuba'an, che' wen chumul, che' ma'anic baq'uen, ²⁴che' c'oc' to i bac'tal, bajñel to i p'atálel. ²⁵Yamba mi' chamel che' wen woli ti wocol. Mach tijicñayic i bac'tal ti pejtelel ora. ²⁶Temel mi' mujquelob ti mucuñibal. Jini motso' mi' pam ñumel ba' ts'al ñololob.

²⁷Cujil chuqui woli la' lon ña'tan. Woli la' tem la' t'an tij contra. ²⁸Cujil mi caj la' c'ajtibeñon: “¿Baqui an wale i yotot jini winic am ba i ñuclel ti oñiyi? ¿Chuqui tsa' tumbenti i yotot jini xjontolil?” che'etla. ²⁹¿Mach ba anic tsa' la' pejca jini ñajt ba ch'oyolob? ¿Mach ba anic tsi' pasbeyonla? ³⁰Che' mi' tilel wocol mach jilicob jini jontolo' ba. Mi' pajyelob majlel ba' tijicñayob. Mach i tajayic i mich'ajel Dios. ³¹Ma'anic majqui mi' tsictesaben i mul. Ma'anic majqui mi' yaq'uen i toj. ³²⁻³³Che' mi' chamel, mi' q'uechob majlel ti mucuñibal. Pejtel winicob x'ixicob mi' joy cantañob majlel. Uts'at jini lum ba' mi' mucob. Cabalob mi' cha'leñob q'ueloñel ti' mujquibal. ³⁴Jini cha'an mi la' lon pejcañon. Ma'anic mi la' ñach'chocobeñon c pusic'al. Mach isujmic chuqui woli la' wal, che'en Job.

Elifaz tsi' yalɔ an cabal i mul Job

22 Tsa' caji ti t'an Elifaz ch'oyol ba ti Teman. ²Winiconla. ¿Mejl ba laj coltan Dios? Anquese cabal lac pusic'al, ¿bajche' mi caj laj coltan? Mach mejliconla. Jini am ba i pusic'al mi' coltan i ba. ³Mi tojet, ¿woli ba a coltan Dios che' jini? Che' toj a bijlel, ma'anic wola' coltan Dios. ⁴¿Chucoch woli' yal'uet ti toj mulil? ¿Chucoch woli' yal'leñet? ¿Cha'an ba tojet? ⁵¿Mach ba cha'anic cabal a mul? Mi cal ma'anic i p'isol a jontolil.

⁶Tsa' wersa c'ajtibeyob prenda a pi'alob. Tsa' chilbeyob i pislel jini p'ump'uño' ba. ⁷Ma'anic tsa' waq'ueyob ja' jini año' ba i tiquin ti'. Tsa' chilbeyob i bal i ñac' jini wi'ñayo' ba. ⁸Jini año' ba i ye'tel tsi' ch'ambeyob i lum. Jini ñuco' ba tsi' ch'ambeyob i chumlib. ⁹Che' jach meq'uel i c'ab tsa' choco majlel meba' x'ixic. Tsa' tic'la meba' alalob mach ba anobic i coltantel. ¹⁰Jini cha'an wola' q'uel ba baq'uen ba ti a joytilel. Tsiltsilñayet ti baq'uen. ¹¹Tsa'ix yajpi a c'ac'al. Mach c'otix a wut. Mi' tilel a wocol che' bajche' but'ja' cha'an mi' sac jisañet. ¹²¿Mach ba chumulic Dios ti panchan? Q'uele jini ñajt ba ec'. ¿Mach ba chanic? ¹³Pero ma' wal: “¿Yujil ba Dios? ¿Mejl ba i c'otel i wut ba'an ic'ch'ipan ba pañimil? ¹⁴Wen pim jini total. Mi' mosben i wut cha'an ma'anic mi' q'uel. Che' jach mi' cha'len xambal ñumel ti' pamlel panchan”, lon che'et.

¹⁵¿A wom to ba c'aytal ti jini jach ba bij tsa' ba i xañayob xjontolilob ti oñiyi? ¹⁶Tsa' bac' jiliyob che' ch'itoñoob to. Tsa' ñumi but'ja' i wets' majlel lum ti yebal i yoc. ¹⁷Tsi' subeyob Dios: “La' ajnicon lojon. ¿Chuqui mi caj lac taj ti Dios?” lon che'ob. ¹⁸Mach i ña'tayic mi jiñach Dios tsa' ba i yal'ueyob i chub'an. Leco bajche' tsi' lon ña'tayob, pero ña'tabilix i cha'an Dios chuqui woli' mel ajñel. ¹⁹Tijicñayob mi' c'aytalob jini tojo' ba. Mi caj i q'uelob i jilibal jini xjontolilob. Jini alalob maxto ba añobic i pusic'al mi' wajleñoob xjontolilob. ²⁰Mi' yalob: “Wets'bilix majlel i chub'an che' bajche' misujelal. Laj pulbil ti c'ajc i colojbal”, che'ob.

²¹La', cañal lac Yum. Mux a taj i ñach'tilel a pusic'al. Che' jini uts'atax chuqui mi caj a taj. ²²Jac'ben i t'an mu' ba i cantesañet. Lotben i t'an ti a pusic'al. ²³Mi mux a cha' sujtel tilel ti lac Yum ti jump'ejl a pusic'al, mux a taj a coltantel.

Yom jach ma' junyajlel cɔy a jontolil. ²⁴Mach a q'uel ti ñuc taq'uin. Lajal jach yom ma' q'uel bajche' ts'ubejn. Yom junlajal ma' q'uel jini oro a cha'an bajche' xajlel am bɔ ti pa'. ²⁵Che' jini mi caj a q'uel jini P'ɔtɔl Bɔ am bɔ ti chan che' bajche' oro yic'ot plata. ²⁶Che' jini mux a taj i tijicñayel a pusic'al ti jini P'ɔtɔl bɔ Dios. Mux a letsan a wut a pejcan Dios. ²⁷Che' ma' pejcan, mi caj i yubiñet. Mi caj a ts'actesan a t'an tsa' bɔ a wɔc'ɔ. ²⁸Che' ma' ña'tan chuqui yom melol, muq'uix i yujtel bajche' tsa' ña'ta. Mach yajpic c'ajc mu' bɔ i pɔsbeñet a bijlel ti pejtelel ora. ²⁹Come Dios mi' ju'sɔben i pusic'al jini chaño' bɔ yic'ot p'ɔtɔl' bɔ. Pero mi' yɔq'uen i ñuclel jini uts bɔ i pusic'al. Dios mi caj i coltan. ³⁰Muc'ach i coltan ja'el jini am bɔ i mul. Muq'uix i yɔq'uet ti coled che' ñusɔbilix a mul. Che' tsa' ujt i t'an Elifaz.

Job yom i pejcan Dios ti wocol t'an

23 ¹⁻²Tsa' caji ti t'an Job: Cha' wulwulña c pusic'al, mach chan cujchix c cha'an wocol. Wen wocol i c'ɔb Dios tic tojlel. Jini cha'an woliyon ti ajcɔn. ³Tijicñayon muq'uic c taj Dios cha'an mic mel c bɔ ti' tojlel. ⁴Com c pejcan ti wocol t'an. Com c suben bajche' añoñ. ⁵Com cubin bajche' mi' jac'. Com c ch'amben isujm. ⁶Ma'anic mi caj i yɔ'leñoñ. Anquese cabɔl i p'ɔtɔl' ma'anic mi caj i c'ɔn tij contra. Muc'ach i p'ison ti' wenta. ⁷Muc'ach c mel c bɔ ti' tojlel come tojon. Uts'at mi caj c loq'uel ti' tojlel c juez.

⁸Mi tsa' majliyon ti' tojel c wut, mach ya'ic an. Mi tsa' majliyon tic pat, mach j q'ueleyic. ⁹Mic majlel tic ts'ej ba' mi' pɔs i c'ɔc'al ñoj ec'. Mach c tajayic. Mach tsiquilic ja'el tic ñoj. ¹⁰Pero yujil Dios baqui mic majlel. Che' bɔ tsa'ix ujt i q'uelbeñoñ c pusic'al, mi caj c loq'uel che' bajche' oro. ¹¹Xuc'ul to coc ti' bijlel ba' tsi' yɔc'ɔyon. Ma'anic tsac wis cɔyɔ ti pejtelel ora. ¹²Ma'anic mic ñusɔben i mandar. Tsa'ix c wen lotbe i t'an tic pusic'al. ¹³Xuc'ul lac Yum. Ma'anic majch mi' xoyben i bijlel. Mi' mel bajche' jach yom i pusic'al. ¹⁴Ts'ɔcɔl mi' mel che' bajche' tsi' wɔn ña'ta i mel. Anto cabɔl chuqui mi' ña'tan i mel. ¹⁵Jini cha'an an c bɔq'uen ti' tojlel. Che' mij c'ajtesan tic pusic'al tsiltsilñayon ti' tojlel cha'an bɔq'uen. ¹⁶Jini P'ɔtɔl Bɔ mi' bɔc'tesañoñ. Jini cha'an c'un pañimil mi cubin. ¹⁷Joyolon ti ic'ch'ipan bɔ pañimil. Jini cha'an mach j q'ueleyic.

Jini xjontolilob mi' p'ojlesañoob wocol ti pañimil

24 Jini P'Atal ba Mach ba Anic i P'isol i P'Atalel mi' wan ña'tan baqui ora mi caj i cha'len meloñel. ¿Chucoch mach yujilobic i cañayo' ba? ²Jini xjontolilob mi' loc'sañoob jini mojon ba' jaxal i lum i pi'lob. Mi' xujch'iñoob majlel i yalac'. Mi' yotsañoob ba' mi' cantañob. ³Mi' wets'ob majlel jini burro i cha'an meba' allob. Mi' chilbeñoob i wacax meba' x'ixic i wenta prenda. ⁴Mi' pan ñusañoob ti bij jini año' ba i wi'ñal. Jini p'ump'uño' ba ti pañimil mi' tats'ob i ba ti bij. Mi' wutschocoñoob i ba ame q'uejlicob. ⁵Mi' seb majlelob ti e'tel che' bajche' burro mach ba anic i yum. Mi' saclañoob wen tac ba pimel ti mate'el cha'an mi' we'sañoob i yalobilob. ⁶Mi' majlelob ti ts'usubil cha'an mi' lotbeñoob i colobal i c'ajbal xjontolilob. ⁷P'ump'un mi' ñusañoob ac'alel. Ma'anic i majquilob. Ma'anic ba' mi' yochelob ti wayel che' i yorajlel tsañal. ⁸Jini ja'al mu' ba i tilel ti wits mi' yach'esañoob ti pejtelel i bac'tal. Mi' macob i ba ti' lejch' xajlel.

⁹Jini xjontolilob mi' chilbeñoob i yalobilob meba' x'ixicob yic'ot ja'el jini allob woliyo' ba ti chu'. Ma'anix mi' chan sutq'uibeñoob i ña' cha'an i bet. ¹⁰Tocol ech'el i pislel, mi' majlelob ti e'tel. Wersa mi' cuchob tilel ixim che' wi'ñayob. ¹¹Ya' ti' yaxñilel olivojil mi' pets'ob loq'uel aceite ti olivo. Mi' pets'ob loq'uel i ya'lel ts'usub che' tiquiñoob i ti'. ¹²Ya' ti colem tejclum woliyob ti ajcan lajal bajche' woli' cajelob ti chamel. Jini lojwemo' ba mi' c'ajtiñoob i coltantel ti wocol t'an, pero Dios ma'anic mi' coltañoob.

¹³An jontolo' ba ts'a' ba mi' q'uelob q'uiñil. Mach i cañayobic i bijlel Dios. Ma'anic mi' pasob i ba ti q'uiñil. ¹⁴Jini stsansa mi' bac' ch'ojyel che' ic'to pañimil. Mi' tsansan jini p'ump'un ba mach ba anic i coltantel. Che' ac'alelix mi' cha'len xujch'. ¹⁵Jini sts'i'lel ba winic mi' pijtan jinto mi' bajlel q'uin. Mi' mos i wut. Mi' yal: "Mach i q'ueleyonic", lon che'en. ¹⁶Che' iq'uix mi' picob lum ti yebal pajc' ba otot ba' yomob ochel. Ti q'uiñil ñup'ulob. Ma'anic mi' pasob i ba ti' saclel pañimil. ¹⁷Mi' cajelob ti ch'ojyel ti ojil ac'alel, come wen ñamlob ti ic'ch'ipan ba pañimil.

¹⁸Lajalob ili winicob bajche' i lumil lojc ja'. Yamba xchumtlob ts'a' mi' q'uelbeñoob i jamil. Jini x'e'telob ma'anic

mi' jac'ob i p̄ayol ti e'tel ya' ti' ts'usubil. ¹⁹Che' bajche' mi' ch̄ay ja' jini tiquin lum ti' yorajlel ticwal, che' ja'el jini mucuñibal mi' jam i ti' cha'an mi' chuc xmulilob. ²⁰Mi' sajtelob ti' tojlel i ña'. Jini jach i motso'lel mi' q'uelob ti uts'at. Ma'anic mi' wis ña'tantelob ti pañimil. Mi' junyajlel lajmel i jontolil che' bajche' mi' c'ascuyel i c'ab te'.

²¹Jontol tsi' melbeyob jochol ba x'ixicob mach ba anic i yalobil. Ma'anic tsi' coltayob meba' x'ixicob. ²²Pero Dios mi' tam'esabeñob i jabilel jini p'at̄alo' ba. Mi' coltañob che' coel i ch̄amel. ²³Mi' cha' p'atesañob. Mi' cha' ch'ejl'añob. Pero Dios woli' ch̄aca q'uelbeñob i bijlel. ²⁴Poj jumuc' jach mi' tajob i ñuclel. Mi' sac jilelob. Mi' yajlelob che' bajche' i yopol w̄ayem ch'ix. Mi' tsejpelel loq'uel che' bajche' i te'el ixim. ²⁵Machic isujm bajche' wolic sub, subula che' jini. ¿Majqui mi caj i sub mach isujmic c t'an? che'en Job.

Bildad mi' ña'tan mach mejlic i q'uejlel ti toj winic

25 Tsa' caji ti t'an Bildad ch'oyol ba ti Suha: ²Bac'ñ̄abil jini am ba ti panchan. Woli ti yum̄antel ti chan. Mi' ñach'chocobenob i pusic'al jini año' ba ti pañimil. ³Mach tsicbilic i yaj coltayajob ti mojt ti mojt. ¿Mach ba c'otic i c'ac'al ti pejtelel pañimil? ⁴¿Tojo' ba ti' wut Dios winicob tilemo' ba ti x'ixicob? ¿Mach ba lu' anic i mul tsa' ba i yilayob pañimil? ⁵Mi mach wen tsiquilic i c'ac'al uw cha'an i ñuclel Dios, mi mach saquic jini ec' ti' wut Dios, ⁶¿bajche' yilal winic? ¿Mach ba lajalic bajche' motso'? Isujm lajal ja'el i yalobil winic bajche' motso' ti' wut Dios, che'en Bildad.

Dios mi' mel chuqui jach yom

26 ¹⁻²Job tsa' caji ti t'an: ¿Che' ba yom ma' coltan jini c'uño' ba? ¿Che' ba ma' q'uechben majlel i c'ab jini mach ba anix i p'at̄alel? ³¿Che' ba yom i cantes̄antel jini mach ba anic i pusic'al? ¿Che' ba ma' w̄aq'uen i ch'amben isujm? ⁴¿Majqui tsi' ȳaq'ueyet a ña'tibal? ¿Baqui ch'oyol jini espíritu mu' ba i ñijcañet ti a t'an?

⁵Tsiltsilña ti baq'uen jini ch̄ameño' ba ti' ye bal pañimil yic'ot i ch̄añil ja' am ba ti colem ñajb. ⁶Lu' jam̄al ti' wut Dios. Ma'anic chuqui mac̄al ti' tojlel. Mi' c'alal c'otel i wut ti' yajñib ch̄ameño' ba. ⁷Dios mi' lich' panchan che' bajche' pisil

ya' ba' ma'anic chuqui an. Che jach mi' ts'uychocon pañimil ya' ba' ma'anic chucul. ⁸Anquese alatax ja'al, ya jach lotol ti total. Ma'anic mi' tojmel total anquese cabal i yalel. ⁹Mi' machben i wut jini uw che' mi' yac' ti ñumel total ti' tojel i wut. ¹⁰Mi' tsictesan ya' ba' jaxal colem ja' ti' pasibal q'uin yic'ot ti' bajlibal q'uin. Ya' ba' mi' c'alal c'otel lac wut ma'anic mi' xab i ba i saclel pañimil yic'ot i yic'lel. ¹¹Mi' bujchel i yoyel panchan, mi' cha'len baq'uen che' mi' cajel ti a'leya i Yum. ¹²Ti' p'atlel Dios mi' ñajch'el colem ja'. Ti cabal i ña'tibal mi' ju'saben i pusic'al i bal ja' chan ba mi' mel i ba. ¹³Cha'an ti' yiq'uilel i yej mi' yac' ti jajmel pañimil. I c'ab mi' yac' ti jilel p'atlel ba lucum am ba ti ja'. ¹⁴Jiñobach i tejchibal jach i p'atlel. I sajl tac jach mi laj q'uel. Che' mi' tsictesan i p'atlel lajalach bajche' i t'an chajc. ¿Majqui mi mejlel i p'is? che'en Job.

Chuqui mi caj i taj xjontolilob

27 ¹⁻²Tsa' cha' caji ti t'an Job: Añonla ti' tojlel Dios tsa'ix ba i contrajiyon. Wolic pejcañetla ti' tojlel jini P'atlel Ba tsa'ix ba i yaq'ueyon ch'aj ba. ³⁻⁴Che' cuxulon to, che' woli to c jap ic', ma'anic mi caj c cha'len lot. Ma'anic mi caj c sub chuqui tac mach isujmic. ⁵Muq'uic c sub isujm bajche' wola' wal, che' jini mach tojonc. C'alal to mic chamel mux c sub ma'anic c mul. ⁶Mach xmulilonic, cha' cho'on. Ñach'al c pusic'al. Ma'anic mu' ti t'an.

⁷Jontolob jini mu' ba i p'ajoñob. La' i tojob i mul jini j contrajob. ⁸Che' mi' chamel jini mach ba anic mi' bac'ñan Dios, che' mi' pajyel ti meloñel ti Dios, ¿chuqui mi caj i taj? ⁹Che' mi' cajel ti oñel cha'an wocol, ¿mu' ba i yubin Dios? ¹⁰¿Tijicña ba ti' tojlel jini mach ba anic i p'isol i p'atlel? ¿Mu' ba caj i pejcan ti pejtelel ora? ¹¹Mi caj j cantesañet bajche' mi' mel Dios ti' p'atlel. Mi caj c sub chuqui mi' ña'tan. Mach c mucuyic. ¹²Tsa'ix la' q'uele jatetla. ¿Chucoch che' jini mi la' sub jini lolom jach ba?

¹³¿Chuqui woli' pijtan xjontolil ti' tojlel Dios? Jiñach i chobejtabal jini xtic'laya mu' ba i yaq'uen jini P'atlel ba Mach ba Anic i P'isol i P'atlel. ¹⁴Mi' p'ojlel i yalobilob, pero cha'an jach mi' jilelob ti espada. Mi' yubiñob wi'ñal i p'olbalob. ¹⁵I colobal i yalobilob mi' cajelob ti chamel cha'an

c'amajel. Anquese mi' c'aytal ti meba' i yijñam, ma'anic mi' yuc'tan. ¹⁶Mi tsi' tempa cabal i taq'uin che' bajche' ts'ubejn, mi tsa' tempayi cabal i pislel, ¹⁷mi caj i cay. Jini tojo' ba mi caj i lapob. Jini mach ba añobic i mul mi caj i t'oxbentelob i taq'uin. ¹⁸Mi' caj ti jilel i yotot tsa' ba i wa'choco xjontolil. Lajal mi' jilel che' bajche' i puyil am yic'ot i yotlel xq'ueloñel ti ts'usubil. ¹⁹Mach jalic jini wen chumul ba mi' majlel ti w'ayel. Mi' ch'ojoyel. Ma'anix tsiquil i chub'a'an. ²⁰⁻²¹Che' bajche' mi' bac' tilel but'ja' che' ja'el mi' tilel b'ab'aq'uen ba ti' tojlel. Ti ac'lalel tal sutujt ic' loq'uem ba ti' pasibal q'uin. Muc'ach i ch'uy majlel. Ñajt mi' c'aytal i yotot cha'an ticaw ba ic'. ²²Ma'anic i p'untantel. Wen p'ump'un jini winic. Ti pejtelel i pusic'al yom puts'el. ²³Winicob mi' jats'ob i c'ab, tijicñayob i pusic'al che' mach sujtitx i yum otot mu' ba i ts'a'leñob. I cha'añobix mi' c'aytal i yotot.

Winicob mi' sac'lañob i ña'tibal

28 An i bijlel tac plata ti yebal lum. An e'tijibal mu' ba i c'añob winicob cha'an mi' chicob loq'uel oro. ²An ba' mi' loc'sañob fierro ti lum. Mi' yulmesañob xajlel cha'an mi' loq'uel ch'achac taq'uin. ³Winicob tam mi' yochelob ti mal lum ti ic'ch'ipan ba pañimil cha'an mi' sajcañob jini letsem tac ba i tojol. Anquese b'ab'aq'uen mi' jilelob, tam mi' majlelob c'lalal ba' jaxal. ⁴Mi' jamob ch'en c'lalal ti yebal lum. Mi' c'lalal majlelob ti jochol ba lum ba' maxto c'otemic winic. Mi' ju'sañob i ba ti tam ba lazo chucul ba i cha'añob. Jamjamña mi' jubelob ochel. ⁵Jini lum mi' yaq'ueñonla i bal lac ñac' cha'an ti la que'tel. Pero ti yebal lum an c'ajc. ⁶Ya' ti' xajb xajlel mi' tajob zafiro x'ab'ab' yic'ot i ji'il oro.

⁷Ma'anic te'lemut mu' ba i camben i bijlel oro. Mach c'otic i wut águila ya' ba' mi' tajtal. ⁸Ma'anic bate'el ya'ya'i. Mach c'otic bajlum. ⁹Pero mi' majlelob winicob yujilo' ba i top' tsats ba xajlel. Mi' jac'ob loq'uel i wi' jini colem wits. Mi' p'ulchocoñob ti pam. ¹⁰Mi' picob majlel bij ti yebal wits. Mi' loc'sañob i t'ojol jax ba ujal wen letsem ba i tojol. ¹¹Mi' wa'chocoñob chan ba ts'ajc cha'an mi' mac'cañob i bijlel colem ja'. Mi' yac'ob ti tsictiyel jini mucul tac ba.

¹²Anquese yujilob pejtél jini, mach yujilobic baquí ch'oyol i ña'tibal mi majqui tsi' yaq'ueyob i ch'amben isujm. ¹³Ma'anic

mi' p'isob ti' wenta mi ñumen an i c'ajñibal lac ña'tibal bajche' oro. Mach tilemic ti pañimil ba' poj chumulonla. ¹⁴Muq'uic lac saclan ti mal ch'en, mach lac tajayic. Muq'uic lac saclan ti colem ñajb, mach ya'ic an. ¹⁵Mach mambilic ti taquuin anquese puro oro. Mach tojbilic ti tsucul taquuin. ¹⁶Mach chombilic ti oro ch'oyol ba ti Ofir mi ti ónice letsem ba i tojol mi ti zafiro. ¹⁷Ñumen an i c'ajñibal bajche' oro yic'ot diamante. Mach quextabibilic cha'an ujal letsem ba i tojol chucul ba ti oro. ¹⁸I t'ojol jax jini tsepbil ba vidrio yic'ot coral, pero ñumen i t'ojol lac ña'tibal. Jini ñaxan ba yom tajol jiñach lac ña'tibal. Ñumen yom mi laj c'uxbin bajche' perla tac. ¹⁹Jini topacio ch'oyol ba ti Etiopía mach mejlic i mambeñonla lac ña'tibal. Anquese alatax oro mach jasalic.

²⁰¿Baqui ch'oyol lac ña'tibal? ¿Majqui mi' yaquueñonla lac ch'amben isujm? ²¹Ya' mucul ba' mach quelbilic i cha'an winicob x'ixicob. Mach quelbilic i cha'an te'lemut ti pañimil. ²²An i tajol mi' yac' i ba ti cajñel che' ti' yorajlel lac chamel yic'ot ti' yorajlel wocol. ²³Añach ti' wenta Dios. Cojach Dios yujil baqui mi' tajtal. ²⁴Come Dios mi' pam quel pañimil c'alal ba' jaxal. Mi' lu' quel chuqui mi' yujtel ti yebal panchan. ²⁵Dios tsi' yaquue i ye'tel ic'. Tsi' p'isi i yonlel colem ja'. Tsi' sube ba' mi' sujtel. ²⁶Tsi' wan sube ja'al bajche' c'amel yom ti pañimil. Tsi' wan pasbe i bijlel jini ic' yic'ot i bijlel chajc woli ba ti t'an. ²⁷Che' jini tsi' yac'a ti tsictiyel i ña'tibal. Tsi' wan ña'ta bajche' yom. Tsi' chajpa. Tsi' yac'a ti quelol. ²⁸Tsi' sube winicob: Ubinla. Jiñach la' ña'tibal che' mi la' bac'ñan la' Yum Dios. Jini jach mi' ch'amben isujm mu' ba i junyajlel cay i mul, che'en.

Job tsi' c'ajtesa i tijicñayel ti wajali

29 ¹⁻²Tsa' cha' caji ti t'an Job: Uts'atax tsi' cantayon Dios ti yamba ora. Uts'at muq'uic i cha' cantañon. Wen tijicñayon ³che' ba tsi' pasbeyon i c'ac'al ti ac'alal. Tsac cha'le xambal ti' c'ac'al. ⁴Wen ch'ejlon che' jini. Tsa' jal'a Dios ti cotot. Tsi' pasbeyon i c'uxbiya. ⁵Che' ba cuxulob to calobilob tic joytilel, che' lac'al an jini mach ba anic i p'isol i p'at'alal, ⁶pejtel chuqui tsac cha'le tsa' loquui ti uts'at. Jini xajlelol ti lac'al tsi' yaquueyon aceite lajal ba i yonlel bajche' pa'. ⁷Tsajniyon ti' ti' tejclum. Tsa' buchleyon ti meloñel ya' ti'

t'ejl ñoj bij. ⁸Jini ch'itoñoob tsi' q'ueleyoñoob ti ñuc. Jini ñoxobix ba tsa' ch'ojyiyob. Wa'alob tsi' pijtayoñoob. ⁹I yalobilob rey tsa' ñajch'i'yob ti t'an che' ba tsa' c'otiyon. Tsi' pasayob i c'ab ti' yej cha'an mi' laj ñajch'elob. ¹⁰Jini ñuco' ba año' ba i ye'tel tsi' c'ayayob t'an. Tsi' pijtayoñoob.

¹¹Tijicñayob jini tsa' ba i yubibeyon c t'an. Uts'at tsi' q'ueleyoñoob. ¹²Come tsa cac'la ti coel jini p'ump'un ba tsa' ba i c'ajti i coltantel. Tsaj colta meba' alalob yic'ot pejtél año' ba i wocol mach ba añobic i yaj coltaya. ¹³Tsaj colta jini coel ba i chamel. Tsac ñuq'uesabe i pusic'al meba' x'ixic. Tsa' caji'yob ti c'ay cha'an tijicñayob i pusic'al. ¹⁴Toj pejtél chuqui tsac cha'le. Tsac t'ojlatesa c ba ti toj ba c melbal che' bajche' winicob mu' ba i lapob i bujc yic'ot i pixol. ¹⁵Joñon i wentajon i wut xpots'. Tsaj c'añal coc cha'an mij coltan jini mach ba weñobic i yoc. ¹⁶I wentajon i tat jini pobre. Tsaj colta ja'el jini mach ba j c'añayobic che' ba tsi' meleyob i ba. ¹⁷Tsac jisabeyob i p'atalel jini jontolo' ba cha'an mi' wersa c'ayob i tic'lan winicob. ¹⁸Tsac lon ña'ta tijicña mi caj c ñox'an ti' tojlel calobilob. Ñach'alon mi caj c chamel che' cabalix c jabilel. ¹⁹Lajalon, lon cho'on, bajche' te' chucul ba i wi' ti' ti' ja', yic'ot i yopol te' am ba i ye'eb ti ac'alel. ²⁰Jini c pi'alob ma'anic mi caj i c'ayob i pasbeñon i c'uxbiya. Mux i yutsi p'ojlel c wersa ti pejtelel que'tel, lon cho'on.

²¹C pi'alob ñach'alob tsi' yubibeyon c t'an. Tsi' pijtayoñoob jinto tsac ñaxan ac'la c t'an. ²²Che' ba tsi' yubiyob, ma'anix majqui tsi' yotsa i t'an. Ma'anic tsi' contrajiyóob. ²³Che' bajche' mi lac pijtan ja'al ti' yorajlel jajmel che' tiquin lac ti', che'i tsi' pijtayoñoob. ²⁴Tsa' toj ñuc'ayob i pusic'al jini año' ba i wocol che' ba tsac jula'tayob. ²⁵Tsac subeyob bajche' yom mi' cha'leñoob. Che'ach añon ti' tojlelob bajche' ñuc ba yumal mu' ba i coltan i winicob. Tsac ñuq'uesabeyob i pusic'al jini ch'ijiyemo' ba.

Job woli ti uq'uel cha'an p'ump'un

30 Mach che'ix waleyi. Mi' wajleñoob winicob yic'ot ja'el ch'itoñoob. Ti yamba ora tsa'ic i c'ajtibeyoñoob e'tel i tatob, ma'anic tsa c'ayob mi jinic jach cha'an mi' pilleñoob ti e'tel c ts'i' woli ba i cantan c tiñame'. ²Tsa'ic c'ayob i ye'tel, ma'añobic i c'ajñibal, come tsa'ix i jisayob

i p'at'alel ti mulil. ³Yajyajob cha'an wi'ñal. Chocbilob majlel ti jochol ba lum ba' ma'anic chuqui mi' colel. ⁴Mi' tue'ob chapay yic'ot i yopol xc'an'ej yic'ot i buts. Mi' c'uxob i ña'al ch'ib.

⁵Chocbilob loq'uel ti tejclum. Jini xchumt'lob ts'a' mi' q'uelob che' bajche' xujch'. ⁶Wersa mi' majlelob ti chumt'al ti' jajp wits yic'ot ti' jajp xajlel. ⁷Muculob ti yebal tsu'um te' mi' cha'leñob oñel. Ya' ba'an ch'ixol cotcotña mi' ñumelob. ⁸Che' bajche' i tatob che'ach ja'el i yalobilob. Ma'añobic i pusic'al. Chocbilob loq'uel ti' tojlel xchumt'lob.

⁹W'ale mi' c'ay'iñoñob ti wajleya. Mi' wajleñoñob ti c'ay. ¹⁰Ts'a' mi' q'ueloñob. Mach yomobic i ñochtañon. Chan mi' melob i ba. Mi' tujbañob c wut. ¹¹Dios tsi' jultes'abeyon c pusic'al. Ma'anix c p'at'alel cha'an mic tic'ob. Jini cha'an ma'anix i frenojelel. Mi' melob bajche' jach yomob. Mach yujilobic quisin. ¹²Mi' xit chocoñoñob tic ñoj cha'an mic yajlel. Mi' yac'ob yac tic bijlel. ¹³Mi' tujc'añob lazo cha'an mi' chucob coc che' woliyon ti ñumel. Yujilob ma'anic caj coltaya. ¹⁴Ti ajñel mi' tilelob i chucon ya' ba' jembil pajc'. Mi' ñolchocoñoñob. ¹⁵W'ale cujilix baq'uen. Ma'anix c ñuclel ti' tojlel winicob. Mach yujilobic p'untaya. Majlemix c wenlel che' bajche' total.

¹⁶W'ale woli' c'uñ'an c pusic'al. Jujump'ejl q'uin chuculon ti wocol mach ba yujilic lajmel. ¹⁷Ti ac'alel c'ux c bac'tal c'al'al mi' taj c baquel. Ma'anic mi' yalq'ueñon c'aj co. Tsac'tsac'ña i c'uxel. ¹⁸Balacñayon tic wayib cha'an wocol. Mic ts'ot c ba tic pislel. Tsats chuculon yubil che' bajche' ti' bic' bujcal. ¹⁹Dios tsi' chocoyon jubel ti oc'ol. Tsa'ix sujtiyon ti ts'ubejn yubil che' bajche' i tañil c'ajc. ²⁰Mic pejcañet ti wocol t'an, Dios, pero ma'anic ma' jac'. Wa'alon ti a tojlel, pero ma'anic ma' q'uelon. ²¹Jontol a pusic'al tic tojlel. Ma'anic ma' p'untañon. Ma' letsan a c'ab a contrañon ti cabal a p'at'alel. ²²Ma' ch'uyon letsel ti sutujt ic' yilal. Mi' wejlesañon majlel. ²³Cujil ti isujm mux caj a payon ti chamel ya' ba' tsa' wan ña'ta a pay majlel pejtcl cuxulo' ba. ²⁴Jini woli ba ti yajlel, ¿mach ba' anic mi' sats' i c'ab? Jini woli ba ti wocol, ¿mach ba muq'uc i c'ajtin i coltantel?

²⁵Cujil uq'uel joñon cha'an jini p'ump'un ba. Cabal tsac tsiqui c pusic'al cha'an jini woli ba ti wocol. ²⁶Jini cha'an tsa cala mux caj a p'untañon. Pero lolom jach tsac pijta j coltantel.

Tsa' p'ojli c wocol. Tsac lon pijta i sac'lel pañimil. Tsa' ic'a pañimil. ²⁷Wen c'ux c pusic'al. Mach c'ajix co. Jini jach wocol mi cubin ti jujump'ej q'uin. ²⁸Meba'on yubil. Wen ch'ijiyem c pusic'al. Che' mic wa'tal ba' tempabilob winicob, mu' jach j c'ajtibeñob j coltantel. ²⁹Che'ach mi' q'ueloñob bajche' i pi'al jontol ba ts'i' yic'ot i pi'al jini xcuj. ³⁰Iq'uix c palchalel cha'an c'amajel. Mi' sujliñiyel. Tiquinix c bac'tal cha'an c'ajc. ³¹Ma'anix tijicña ba tic tojlel. Jini arpa yic'ot amay mi cha'leñob uq'uel. Mi yuc'tañoñob cha'an wen ch'ijiyem c pusic'al.

Job tsi' cha' ala tojach i pusic'al

31 Tsa'ix c mele trato yic'ot c wut cha'an mi caj j cantan c wut ti' tojlel xch'oc. ²Machic tsac tiq'ui c ba, ¿chuqui c chobejtabal ti Dios? ¿Bajche' mic toj c mul ti' tojlel jini P'atal ba Mach ba Anic i P'isol i P'atallel? ³¿Mach ba muq'ueic i taj cabal wocol jini xmulil? ¿Mach ba muq'ueic i jilel jini xjontolil? ⁴Dios ¿mach ba wolic i q'uel mi toj c bijlel? Mi' p'is ti' wenta jujunxan coc.

⁵Tsaj canta c ba. Mach kujilic lot. Ma'anic tsac pi'le majlel jini yujilo' ba lotiya. ⁶La' i p'ison Dios ti balanza che' mi' melon. Mux i ña'tan ma'anic c mul. ⁷Xuc'ul tsac ñopbe i bijlel. Tsa'ic j caya i bijlel c Yum, tsa'ic c jac'a i payol c wut, tsa'ic c mula jini mach ba c cha'anic, ⁸la' i c'uxob yaño' ba jini tsa' ba c pac'a joñon. La' bojquic c pac'ab woli ba i yac' i wut.

⁹Tsa'ic c pejca x'ixic, tsa'ic c hijta c pi'alob ti xchumtal, ¹⁰la' cajic ti juch'bal quijñam ti' wenta yamba. La' i tic'lañob winicob. ¹¹Pero tic'bil ti ley jini jontolil. Wersa mi' tojtal ti melobajal. ¹²Tsa'ic c cha'le jontolil, i wentajach c'ajc mu' ba caj i jisan pejtél c chub'an. Mach yajpic jinto mi' laj pulel.

¹³Mi tsac chilbeyob i coltantel x'e'telob c cha'an che' woli' c'ajtiñob, ¹⁴¿chuqui mic mel ti' tojlel Dios che' mi' tilel i melon? ¿Bajche' mi caj c jac'? ¹⁵Jini c Yum tsa' ba i meleyon ti' ñac' c ña' tsi' meleyob ja'el. Junlajal jach tsi' meleyonla. Tsi' yac'lyonla ti cantantel ti' tojlel lac ña'.

¹⁶Mi tsac chaclibe jini pobre chuqui tac tsi' c'ajti ti wocol t'an, mi tsac techbe i wocol jini meba' x'ixic, ¹⁷mi tsac ña'ta mic bajñel ñaj'an, mi tsac chaclibe i bal i ñac' meba' alal che' jasalon, la' c taj c wocol. ¹⁸Pero mach che'ic tsac mele. Tsa

cosa meba' alal che' bajche' calobil c'ala che' ba tsi' q'uele pañimil. ¹⁹Che' ba tsac ña'ta pits'il jini pobre mach ba anic i yotot mi i bal i ñac', ²⁰anquese mach c pi'alic, tsa clq'ue i lap i tsutsel c tiñame'. ²¹Mi tsac letsa j c'ab ti meloñel ti contra jini meba' cha'an mic tajben i yutslel winicob, ²²mi che'ach tsac mele, la' chojq'uec loq'uel i baquel quejlab cha'an c mul. La' ts'ojquic j c'ab ya' ba' chucul. ²³Pero tsac bac'ña Dios mu' ba caj i melon. Wen ñuc i yumantel. Jini cha'an ma'anic tsac mele jini jontolil.

²⁴Mi tsa cac'la ti ñuc jini oro che' wen chumulon, ²⁵mi tijicñayon cha'an cabal c chub'an, mi tsa jach c ña'ta c p'ojlesan cha'an mic chan'esan c ba, ²⁶⁻²⁷mi tsac ch'ujutesa jini q'uin cha'an i t'ojol jax ya' ti panchan, yic'ot jini uw mu' ba i xantán panchan ti' ñuclel, mi tsac pejca ti oración, ²⁸mulil jini. Tsa'ic c mele jini, wersa mic mel c ba ti' tojlel juez. Che'ic jini, mach xuc'ulonic ti Dios am ba ti panchan.

²⁹Mi tijicñayon ba' ora tsi' taja wocol jini mu' ba i ts'a'lleñon, mi tijicñayon cha'an ch'ijiyem i pusic'al jini woli ba i contrajiñon, ³⁰mulil tsa'. Pero mach che'ic tsac mele. Ma'anic tsac p'aja j contra. Ma'anic tsaj c'ajtibe Dios cha'an mi' yac' ti chamel. ³¹Jini chumulo' ba quic'ot tsi' q'ueleyob. Tsac wen aq'ueyob we'elal c winicob. ³²Ma'anic tsaj c'ayal ti bij jini ñajt ba ch'oyolob. Tsac jambeyob i ti' cotot. Tsac p'ayayob ochel. ³³Mi tsac mucu c mul che' bajche' i yalobil Adán, mi tsac ñopo c muc tic pusic'al cha'an baq'uen ³⁴ame a'lenticon ti' tojlel winicob, ame ts'a'lenticon cha'an c pi'alob ti mojt ti mojt, mi cha'an c mul tsac ñup'u c ba ti cotot, ³⁵la' i melon Dios, jini P'atal Ba. Umba'añon. La' tilic i melon ti uts'at ti' tojlel jini tsa' ba i jop'beyoñob c mul ti jun. ³⁶Che' jini tijicñayon mic jac' che' mi' p'ayon tij c'aba'. Mux c lac' c ba che' bajche' juntiquil lapal ba i cha'an corona. ³⁷Che'ic jini mach muc'onic ti quisin. Muc'ach c ñochtan Dios che' bajche' i yalobil rey. Muc'ach c lu' suben chuqui tsac mele.

³⁸Mi an c mul ti' tojlel c lum, mi p'ump'un i tsolom cha'an ma'anic tsa clq'ue i c'aj i yo, ³⁹mi tsaj c'uxu i wut c pac'ab che' mach tojbilic x'e'telob, mi tsac chilbeyob i lum yaño' ba, ⁴⁰mi tsac mele bajche' jini, la' colic ch'ixol ti' yajñib trigo. La' pam colic ch'ix ti' yajñib cebada che'en Job.

Eliú mi' yal an ti' wenta cha'an mi' jac'ben Job

32 Jini cha'an ma'anix tsi' ch'an jac'beyob i t'an Job jini uxtiquil, come tsi' q'ueleyob woli' q'uel i ba ti toj Job. ²Pero wen mich'ix juntiquil wa'al ba ti' t'ejl, i c'aba' Eliú (i yalobil Baraquel ch'oyol ba ti Buz ti' yotot Ram). CALAX jax i mich'ajel, come Job woli' q'uel i ba ti toj, pero woli' yal mach tojic Dios. ³Eliú tsi' mich'le ja'el jini uxtiquil i pi'llob, come tsi' yalloyob an i mul Job, pero ma'anic tsi' wen jac'beyob bajche' yom. ⁴Ñach'lal tsa' calé Eliú che' ti ñaxan, come ch'iton to. Maxto cabalic i jabilel che' bajche' i pi'llob. ⁵Pero tsa' mich'a che' ba tsi' q'uele mach yujilobic jac'ol jini uxtiquil.

⁶Eliú (i yalobil Baraquel, ch'oyol ba ti Buz) tsa caji' yal: Ch'itoñon to ti la' tojlel. Ñoxetixla. Jini cha'an tsac tiq'ui c ba ti t'an cha'an baq'uen. Ma'anic tsac subeyetla bajche' wolic ña'tan. ⁷Tsa cala: La' i yalob jini ñoxo' ba, come cabal i jabilel, cabal ja'el i ña'tabal, cho'on. ⁸Pero jiñach i yespíritu winic mu' ba i yaq'uen i ch'amben isujm, yic'ot i yEspíritu Dios jini P'atal ba. ⁹Mach cha'anic lac jabilel mi lac taj lac ña'tabal. Mach jinic jach jini ñoxobix ba mi' ch'ambeñob isujm toj ba meloñel. ¹⁰Jini cha'an ñich'tabeñon c t'an. Joñon ja'el mi caj c sub bajche' wolic ña'tan.

¹¹La' wilan, tsa'ix c pijta la' t'an. Tsa'ix c wen ñich'ta che' ba tsa' la' wala pejtél woli ba la' ña'tan, che' ba tsa' la' tsictesa la' pusic'al. ¹²Ma'anic tsaj cala c ñich'tañetla. Pero ubinla. Ma'anic tsa' la' jac'be i t'an Job. Mach la' wujilic bajche' yom jac'ol, mi juntiquileticla. ¹³Mach yomic mi la' lon al: "Anix lac ña'tibal joñonla. Jini jach Dios mi mejlel i ju'saben i pusic'al". ¹⁴Job ma'anic tsi' p'isiyon ti wenta che' ba tsi' pejcayetla. Mach lajalic mi caj c pejcan che' bajche' jatetla.

¹⁵Mi' toj sajtel la' pusic'al. Mach la' wujilic bajche' yom jac'ol. Ñach'letixla. ¹⁶¿Yom ba mic ch'an pijtan la' t'an? ¿Yom ba mic ñajch'el che' bajche'etla? ¹⁷Joñon ja'el mi caj c jac'. Mi caj c subeñetla chuqui cujil. ¹⁸But'ulix c pusic'al. Mach mejlix c tic' c ba ti t'an. ¹⁹Che'lach añon bajche' tsiji' ba pachi but'ul ti vino. Yomix tojmel cha'an ma'anic i ti'. ²⁰Wersa mi caj c pejcañetla. ²¹Mach jelchojquic jach mij q'uel winicob. Ma'anic mic lotiñob

ti uts ba t'an. ²²Mach mejlic c sub ti ñuc jini mach ba ñuquic. Mi tsac mele bajche' jini, ba ba q'uen mi' jisañon Dios tsa' ba i meleyon.

Eliú tsi' tiq'ui Job

33 Ubibeñon c t'an, Job. Ñich'tan pejtél chuqui mic subeñet. ²Awilan tsa'ix c chajpa c ba. Comix c cha'len t'an. ³Jini woli ba c subeñet, mic sub ti pejtelel c pusic'al. ⁴I yEspíritu Dios tsi' meleyon. Ya' ch'oyol j cuxtilel ti' yiq'uilel i yej jini P'atál Ba. ⁵Subeñon mi a wujilach jac'ol. Chajpan a t'an. La' c'ajtibeñon. ⁶Awilan, lajalón bajche' jatet ti' tojlel Dios. Lajal melbilonla ti lum. ⁷Mach a ba c'ñañon. Mach a cha'len quisin. Ma'anic wolic xic'beñet.

⁸Tsa'ix a cha'le t'an. Tsa'ix cubi. Tsac ñich'tabeyet a t'an. Tsa' wala: ⁹“Tojon, ma'anic c mul. ¹⁰Pero Dios mi' wersa taj leco tac ba tic tojlel mu' ba i mich'len. Mi' q'uelon che' bajche' i contra. ¹¹Mi' ñet'beñon coc ti tocol ba te'. Mi' cha'ca q'uel pejtél chuqui mic cha'len”, lon che'et.

¹²Wolix c jac'beñet. Mach isujmic bajche' wola' wal. Wen ñuc Dios. Mach ñuquic winic. ¹³¿Chucoch ma' lon al ma'anic mi' jac'beñet che' woliyet ti wocol? ¹⁴Che' mi' cha'len t'an Dios, jasal junyajl mi' yal. Mach wersajix i cha'yajlel cha'an mi lac ña'tan isujm. Muq'uic lac ñusaben i t'an mi' chan pejcañonla. ¹⁵Che' woliyonla ti ñajal yic'ot che' an chuqui mi laj q'uel ti ac'alel, ¹⁶Dios mi' yaq'ueñonla lac cha' ñich'tan lac tic'ol. Mi' yaq'ueñonla lac tsic pusic'al ame i tajonla wocol. Mi' cha' toj'esañonla. ¹⁷Mi' ma'ctabeñonla lac bijlel che' mach tojic cha'an mi' ju'sabeñonla lac pusic'al ¹⁸ame jiliconla ti espada, ame chojquiconla ba' mi lac chamel.

¹⁹Mi' cantesañonla ja'el che' c'amonla. Che' wen c'ux i p'aquelel winic che' ñolol ti' wayib, ²⁰mi' ts'a'len i bal i ñac'. Mach chan yomix i c'ux waj. ²¹Mi' tiquin i bac'tal. Yajyajix, tsiquilix i baquel. ²²Cabal mi' jal'an ti' ti' i yajñib chameño' ba. Colel i chamel. Mi' yutsi c'uñ'an pañimil. ²³Ti jini jach ba ora mi tsa' tili ángel loq'uem ba ti' tojlel bajc'al i pi'lob ti panchan cha'an mi' toj'esán majlel ba' uts'atax, ²⁴che'ic jini, uts mi' pas i ba Dios ti' tojlel jini winic. Mi' yal: La'ix colic. Ma'anic mi' caj ti chamel. Tsa'ix c tojo cha'an mi' colel. ²⁵Cha'an tsi' caya i mul jini winic, jini cha'an mi caj i cha'

wen'an. Lajal mi caj i sujtel i bΛc'tal bajche' ch'iton, wen ch'ejl bΛ, che'en Dios. ²⁶Dios mi' jac' ti uts'at che' mi' pejcan jini winic. Che' mi' q'uelben i wut Dios tijicña jini winic. Mi cha' cajel ti cuxtiyel che' bajche' ti yambΛ ora. ²⁷Mi caj i suben i pi'Λlob bajche' tsa' coltanti ti Dios. Tijicña i pusic'al mi' cha'len c'ay. Mi' yΛl: "Tsa'ix c cha'le mulil. Tsac xoyo c bijlel, pero ma'anic tsi' yΛq'ueyon c toj c mul. Tsi' p'untayon Dios. ²⁸Tsi' mañayon cha'an mi' coltañon. Jini cha'an ma'anic tsa' sajtiyon ba'an chameño' bΛ. Cha' anix wen bΛ c pusic'al", che'en jini winic.

²⁹Pejtelel iliyi mi' mel Dios ti' tojlel winicob. Mach junyajlic jach. I cha'yajlel yic'ot i yuxyajlel mi' mel ³⁰cha'an mi' sutq'uiñoob i bΛ winicob ame majlicob ba'an chameño' bΛ. Che' jini mi' pasbeñoob bajche' yom mi' melob. Mi' yΛq'ueñoob i cuxtalel. ³¹P'isi ti wenta, Job. Ñich'tabeñoob. Yom ñach'Λlet che' mic chan pejcañet. ³²Mi tsa' ña'ta bajche' mi' caj a coltan a bΛ, subeñoob, come tijicñayon mi' tsa' mejli c paset ti toj. ³³Mi mach a womix a cha'len t'an, ubiñoob. Yom chan ñach'Λlet cha'an mij cantesañet bajche' yom mi' mel jini am bΛ i pusic'al, che'en Eliú.

Eliú mi' tsictesan tojach Dios

34 ¹⁻²Eliú woli' to i chan sub: Ubinla c t'an winicob cabal bΛ la' pusic'al. Mi añach la' pusic'al ñich'tañon. ³Come lac chiquin mi' cha'len probar che' mi' la cubin t'an. Che' ja'el la quej mi' majts'an i bal lac ñac'. ⁴La' lac yajcan chuqui uts'at ti jujuntiquilonla. La' lac tem ña'tan chuqui toj. ⁵Come Job tsi' subu i bΛ ti toj. Tsi' lon aΛ tsa'ix i chilbe meloñel Dios. ⁶Anquese toj mi' bajñel q'uel i bΛ Job, pero xlot ti lac wut. Woli' q'uel i bΛ ti uts'at, pero añach i lojwel mach bΛ yujilic lajmel. ⁷¿Am ba yambΛ winic lajal bΛ i mul bajche' Job? Mi' cha'len p'ajoñel che' bajche' mi' jap ja'. ⁸Mi' pi'len ti mulil xjontolilob. Temel mi' majlel yic'otob. ⁹Tsi' yΛlΛ mach lac tajayic lac wenlel ti Dios.

¹⁰Jini cha'an ubinla c t'an, winicob año' bΛ la' pusic'al. Ti pejtelel ora ma'anic mi' wis cha'len mulil Dios. Jini P'AtΛ bΛ Mach bΛ Anic i P'isol i P'AtΛlel mach yujilic jontolil. ¹¹Bajche' jach mi' mel winic, mi' caj i yΛq'uentel i chobejtΛbal ti Dios. Che' bajche' yom lac melbal che'Λch mi' caj la' cΛq'uentel.

¹² Isujm, mach yujilic jontolil Dios. Jini P'atAl ba Mach ba Anic i P'isol i P'atAllel mi' melonla ti toj. ¹³ ¿Majqui tsi' yaq'ue i ye'tel ti pañimil? I bajñel tsi' wa'choco pejtel pañimil. ¹⁴⁻¹⁵ Tsa'ic i chilbeyonla i yEspíritu, tsa' laj chamiyonla ti pejtelonla. Tsa'ic i cha' ch'ama i yEspíritu yic'ot i yiq'uilel i yej, tsa' sujtiyonla ti ts'ubejn.

¹⁶ Mi an a ña'tibal ubin jini. Ñich'tan chuqui wolic sub. ¹⁷ Jini Yujil ba Meloñel, ¿mu' ba caj i ts'a'len chuqui toj? ¿Mach ba ñuquic ti a pusic'al jini mero Toj Ba? ¹⁸ Jiñach mu' ba i ya'len jini ñuco' ba año' ba i ye'tel ti pañimil. Mi' subeñob i mul. Mach yujilic baq'uen. ¹⁹ Mach jejchoquic jach mi' q'uel winicob. Junlajal mi' pasbeñob i yutslel jini pobrejob yic'ot jini wen chumulo' ba. Junlajal i melbalonla. ²⁰ Ti jujumuc' an baq'uen mi lac chamel ti q'uiñil yic'ot ti ac'lalel. Jini chano' ba yic'ot jini pec'o' ba mi' ñijcuyelob, mi' jilelob. Jini año' ba i ye'tel mi' loq'uelob ti' ye'tel che' bajche' wan ña'tibil ti Dios.

²¹ Dios mi' laj camben i bijlel winicob. Mi' p'is ti wenta pejtel chuqui mi lac cha'len. ²² Ma'anic ic'ch'ipan ba pañimil ba' mach c'otic i wut. Ma'anic ba' mi mejlel i mucob i ba xjontolilob. ²³ Ma'anic mi' wan subeñonla Dios baqui ora mi caj i payonla ti meloñel. I bajñel yujil chuqui woli' mel. ²⁴ Ma'anic mi' wan sub che' mi caj i jisan jini p'atAllo' ba. Mi' chilbeñob i ye'tel. Mi' yaq'uen yaño' ba. ²⁵ Wen cañal ti Dios pejtel i ye'tel ili yumalob. Mi' chocob loq'uel ti' ye'tel ti jump'ejl jach ac'lalel mach ba wan ña'tibilic i cha'añob. Mi' jisañob. ²⁶ Mi' jats' jini xjontolilob ti' wutob i pi'alob. ²⁷ Come tsi' cayaob i tsajcan Dios. Mach ñuquic ti' pusic'alob i bijlel Dios. ²⁸ Pero Dios tsi' yubibeyob i yuq'uel jini p'ump'uño' ba. Tsi' yubibeyob i t'an jini tic'labilo' ba. ²⁹ Mi ñach'al jach Dios, ¿yom ba mi lac jop'ben i mul? Mi tsi' mayal i wut, ¿bajche' mi caj laj q'uel? Dios mi' chaca q'uelonla ti jujuntiquilonla. Mi' q'uel pejtel winicob ti mojt ti mojt. ³⁰ Mi caj i loc'sañob ti' wenta jini yumal mach ba anic mi' bac'ñan Dios cha'an mi' yac'ob ti colel ba' tsats chuculob che' bajche' ti yac.

³¹ Jatet, Job, yom ma' suben a mul Dios. Suben che' bajche' jini: "Tsa'ix cubi wocol. Tsa'ix a ju'sabeyon c pusic'al. Mach chan comix c cha'len mulil". Che'ach yom ma' suben.

³² C'ajtiben Dios a cantesantel cha'an mi' tsictesabeñet a mul maxto ba a ña'ta. ³³ Che' jini mux i subeñet bajche' c'amel yom

ma' toj a mul. ¿Mach ba che'ic yom? Cha'len yajcaya jatet. An ti a wenta. Subeñon bajche' wola' ña'tan. ³⁴⁻³⁵Winicob año' ba i pusic'al mi caj i subeñon sojqem i jol Job. Majqui jach mi' ch'amben isujm mi caj i yal mach cu anic i pusic'al. ³⁶Joñon mi cal: La'to i yubin wocol Job. La' i toj i mul. Come lajal mi' cha'len t'an bajche' xjontolilob. ³⁷Chan mi' mel i ba. Mi' contrajiñonla. Mi yutsi p'ojlesan i t'an ti' contra Dios, che'en Eliú.

35 ¹⁻²Eliú tsi' chan cha'le t'an: ¿Yomto ba ma' chan sub a ba ti toj? ¿Mu' ba a lon ñop mach tojic Dios? ³Wola' wal: “¿Chuqui mi lac taj ti' tojlel Dios cha'an tojonla? ¿Mach ba lajalic mi' coltan xmulilob?” lon che'et. ⁴Mi caj c subeñet yic'ot a pi'lob, ⁵letsan la' wut ti chan. Q'uelela. Nejñanla jini tocal am ba ti chan. ⁶Mi an a mul, ¿mu' ba caj ti yajñel i pusic'al Dios cha'an jini? Mi calaxix a mul, ¿mu' ba caj i yasiyel i pusic'al? ⁷Mi tojet ¿woli ba a coltan Dios? ¿Mu' ba caj i ch'am i majtan ti a c'ab? ⁸Pero mi an a mul ma' bajñel ac' a ba ti wocol cha'an a mul. Mi tojet ma' coltan winicob. ⁹Che' cabal mi' yubiñob wocol winicob cha'an i tic'lan tel, c'am mi' cha'leñob oñel cha'an yomob loq'uel ti' c'abob jini xtic'layajob. ¹⁰Ma'anic majqui mi' yal: “¿Baqui an Dios tsa' ba i meleyon, mu' ba i yac'on ti c'ay ti ac'alel?” ¹¹Dios mi' yal'ueñonla lac pusic'al yic'ot lac ña'tibal ñumen bajche' bate'el yic'ot te'lemut am ba ti pañimil. ¹²Mi' lon pejcañob Dios jini xjontolilob chan ba mi' melob i ba. ¹³Dios ma'anic mi' ñich'tabeñob i t'an jini mach ba i cha'añobic. Jini C'ax P'atla Ba ma'anic mi' p'isob ti wenta. ¹⁴Jini cha'an ma'anic mi' p'iset ti wenta come ma'anic wola' p'is Dios. Anquese jal ma' pijtan, ma'anic woli' pas i ba. Ma'anic woli' melet che' bajche' tsa' wala. ¹⁵Isujm ma'anic mi' tilel i jula'tañet Dios come mich'. Che jach mi' ñusañet come ts'a' mi' q'uel a mul. ¹⁶Jini cha'an, Job, wola' lon letsan a t'an. Anquese cabal a t'an ma'anic a ña'tibal, che'en.

Eliú tsi' subu i ñuclel Dios

36 ¹⁻²Eliú tsi' yala ja'el: Anto yom ma' wubiñon. Mi caj j cantesañet. Come cabalto yom mic subeñet ti' wenta Dios. ³Tsajniyon ti ñajtal cha'an mic taj tilel c ña'tibal. Mi caj c pasbeñet tojch Dios. Tojach tsa' ba i meleyon. ⁴Isujmach c t'an. Mach c lotic. Cujil chuqui mic subeñet. Cabal c ña'tibal.

⁵P'atallach Dios, wen cabal i ña'tibal, pero ma'anic mi' ts'a'len winicob mi juntuquili. Mi' laj ch'am ti' wenta. ⁶Ma'anic mi' jaltasaben i jabilel jini xjontolil. Dios mi caj i mel ti uts'at jini tic'labil ba. ⁷Ma'anic mi' wis cay i q'uel jini tojo' ba. Mi' wa'chocoñob yic'ot reyob am ba i yumantel. Che' jini mi' tajob i ñuclel. ⁸Mi tsa' c'ajchiyob ti ñujp'ibal, mi tsi' yubiyob cabal wocol, ⁹Dios mi' yalq'ueñob i ña'tan i mul. Mi' pasbeñob i chanlel i pusic'al. ¹⁰Mi' jambeñob i chiquin cha'an mi' yubiñob i tic'ol. Mi' subeñob cha'an mi' cayob i mul. ¹¹Mi tsi' yubibeyob i t'an, mi tsi' jac'beyob, che' jini mi caj i ñajt'an i jabilel ti pañimil c'allal che' ñoxobix, tijicñayob i pusic'al. ¹²Pero mi ma'anic tsi' ch'ujbibeyob i t'an, tsiquil che' jini ma'anic i ña'tibal. Mi' cajelob ti chamel ti espada.

¹³Pero jini mu' ba i lon pasob i ba ti toj che' mach tojobic muq'ui x i tajob i mich'lel Dios. Ma'anic mi' sutq'uiñob i ba che' mi' tic'ob. ¹⁴Mi' chamelob che' ch'itoñob to. Mi' lon jisañob i ba ti' ts'i'lel. ¹⁵Pero Dios mi caj i p'untan jini tic'labilo' ba woliyo' ba ti wocol. Mi' jambeñob i chiquin cha'an mi' ñich'tañob che' woliyob ti wocol.

¹⁶Yom to Dios i payet loq'uel ti wocol cha'an ma' taj ñuc ba a wajñib ba' tijicñayet. Yom i charabeñet a mesa yic'ot pejtél chuqui tac wen. ¹⁷Pero wersa tsi' yalq'ueyet wocol cha'an a melbal, come junlajalet yic'ot xjontolilob. Wolix i melet cha'an a mul. Jini cha'an woliyet ti wocol. ¹⁸Tsajaletme ame cajiquet ti a'leya che' wola' wubiben i mich'ajel. Mach a mich'len Dios cha'an sajtem a chub'an. ¹⁹Anic to a chub'an, ¿chuqui i ye'tel? Mach mejlic i coltañet. Mach mejlic i lajmesabeñet a wocol cha'an ma' cha' c'oc'an. ²⁰Mach a lon pijtan ac'lalel, come mi' p'ojlel wocol che' mach yaxalic la co. ²¹Tsajaletme ame a ñop jontolil, come cha'añach a jontolil tsa' tili ili wocol i yilabeñet a pusic'al. ²²Awilan, wen chan Dios, cabal i p'atallal. ¿Majqui yujil cantesa che' bajche' Dios? ²³¿Mejl ba lac pasben bajche' yom i mel? ¿Yom ba mi lac p'ajben i ye'tel? Mach yomic.

²⁴Yom ma' ñuq'uesan cha'an ñuc tac ba i melbal. Cañal i melbal ti pejtelel pañimil. ²⁵Q'uelel lac cha'an ti pejtelonla, anquese winicon jach la mu' ba caj lac chamel. Pero mi lac yaxña q'uelben i melbal Dios. ²⁶Awilan, wen ñuc Dios. Mach lac lu' cambeyic i pusic'al. Mach tsicbilic i jabilel. ²⁷Mi' yac' ti

letsel i yowix ja'. Mi' sujtel ti ja'al ti chajc' ti chajc'. ²⁸I yowix colem ñajb mi' cha' ch'ujyel letsel ti total. Jini total mi yac' ja'al ti lum. Mi' yach'esañonla. ²⁹Ma'anic majqui mi' ch'amben isujm bajche' mi' pam puc i ba total mi bajche' mi' cajel ti t'an chajc loq'uem ba ti' pam total ba' buchul Dios. ³⁰Awilan, mi' pas i c'ac'al chajc am ba ti' joytilel. Mi' tsictesan i jol wits. ³¹Dios mi' pasbeñonla i p'atalel ti pañimil che' mi' melonla yic'ot che' mi' yac'ueñonla i bal lac ñac'. ³²Mi' chuc jini chajc ti cha'ts'ijit i c'ab. Toj jach mi' choc tilel ba' mi' mel i ye'tel ti pañimil. ³³I t'an chajc mi' subeñonla lac'al Dios. Jini bate'el mi' p'is ti wenta che' tal ja'al.

37 Tsiltsilña c pusic'al mi cubin, tap'tap'ña ti baq'uen. ²Ubiben i t'an Dios. Che'ach yubil bajche' i t'an chajc. ³Mi' pam ñumel ti yebal panchan. Mi' tsictiyel i c'ac'al chajc c'alal ti' ti' pañimil. ⁴Wi'il mi' yubintel i t'an. Wen c'am mu' ti t'an. Mi' c'alal ubintel ti ñajt ba pañimil. Ma'anic majqui mi mejlel i tic'. ⁵Mi' cha'len t'an Dios che' bajche' mi' cha'len t'an chajc. Mi' mel ñuc tac ba mach ba anic mi lac ch'amben isujm. ⁶Cha'an ti' caj i mandar mi' jubel ti pañimil i ña'al tsañal. Mi' choc tilel ja'al jini musmusña ba yic'ot chalacña ba che' ti' yorajlel. ⁷Mi' ñup'onla ti la cotot ti pejtelel pañimil cha'an mi' lac ña'tan jiñach i melbal Dios. ⁸Jini jontolo' ba bate'el mi' sujtelob ti ch'en ba' mi' wayelob.

⁹Loq'uem ti sur mi' tilel sutujt ic'. Loq'uem ti norte mi' tilel tsañal. ¹⁰Dios mi' wujtan jini colem ja', mi' sujtel ti tuñija'. Tsats i pam. ¹¹Isujm mi' latschocon total am ba i ya'lel. Ya' ti total mi' mel chajc. Mi' choc tilel. ¹²Ti chajp ti chajp an ti' wenta Dios. Ti' caj i mandar Dios mi' joy ñumel ti pejtelel pañimil. Mi' cha'len bajche' jach subebil. ¹³An i tajol mi' choc tilel cha'an mi' toj'esañonla. An i tajol mi' pasbeñonla i yutslel. Jiñach Dios mu' ba i yac'uen i ye'tel.

¹⁴Ubin, Job, yom ñach'allet cha'an ma' ñich'tan c t'an. P'isi ti wenta jini ñuc ba i melbal Dios. ¹⁵¿Awujil ba bajche' mi' yac'uen i c'ajñibal pejtél i melbal? ¿Bajche' mi' yac' ti lejmel i c'ac'al chajc ti total? ¹⁶¿Bajche' mi' p'isulan i yalel total che' bajche' ti balanza? Jiñach ñuc ba i melbal Dios, ts'ac'al ba i ña'tabal. ¹⁷¿Awujil ba chucoch ma' cha'len bu'lich che' ñach'al pañimil, che' ya jach ti sur woli' tejchel tilel ic'? ¹⁸Dios tsi' lich'i panchan che' bajche' colem espejo. Jixcu

jatet, ¿awujil ba lich'ol? ¹⁹Mi cablɔlɔch a ñatibal, subeñon lojon bajche' yom mic pejcan lojon Dios, come tontojon lojon. Ma'anic lojon c pusic'al. ²⁰¿Yom ba mi lac wersa suben Dios cha'an mi' pejcañonla? ¿Mach ba muq'uic i mich'leñonla che' jini?

²¹Ma'anic mi laj q'uel che' mɔcɔl pañimil. Ma'anic mi laj q'uel i c'ac'al q'uin, pero ya' jach an ti pam total ba' tsi' yac'ɔ Dios. Jinto mi' tilel ic' i wets' majlel total mi' caj ti jajmel.

²²Che' ja'el mach mejlic laj q'uel Dios che' mi' jubel tilel ti lac tojlel. Jini jach mi laj q'uel i c'ac'al i pislel jini mucul ba woli ba ti yumantel. ²³Mach laj cambeyic pejtél i p'atɔlel jini P'atɔl ba Mach ba Anic i P'isol i P'atɔlel. Anquese toj mi' cha'len meloñel, pero uts i pusic'al ja'el. Ma'anic mi' jisan toj ba.

²⁴Jini cha'an winicob mi' ch'ujutesañob. Pero Dios ma'anic mi' p'is ti wenta jini chan ba i pusic'al. Tsa' ujti ti t'an Eliú.

Dios tsi' tsictesa i ñuclel

38 Dios tsa' caji i jac'ben Job ti sutujt ic': ²¿Majqui jini woli ba ti t'an mach ba yujilic chuqui woli' yal? Woli jach i muc c ña'tibal. ³Wa'i. Pasa a ba ti wen ch'ejl che' bajche' winic. An chuqui mi caj j c'ajtibeñet. Jatet mi caj a jac'beñon.

⁴¿Baqui añet che' ba tsa' caji c wa'chocon pañimil? Subeñon mi awujil, mi ña'tibil a cha'an. ⁵¿Majqui tsi' wan ña'ta bajche' yom p'istɔl pañimil? ¿Awujil ba? ¿Majqui tsi' sapchoco i plomo ba' jaxɔl i ti'? ⁶¿Chuqui i c'ac'lib ya' ba' wa'al i yoyel? ¿Majqui tsi' yotsa jini ñuc ba xajlel am ba ti' xujc otot? ⁷Tsi' tem cha'leyob c'ay jini ec', che' yomix sac'an pañimil, che' ba tsi' cha'leyob oñel pejtél i yalobilob Dios cha'an tijicñayob i pusic'al.

⁸¿Majqui tsi' yotsabe i ti' colem ñajb che' ba tsa' caji ti tojmel loq'uel ya' ba' cantabil? ⁹Che' ba tsac pixi ti total che' bajche' ti tsuts, tsac bac'ɔ i ic'ch'ipan ba pañimil. ¹⁰Tsac ñup'u ti tranca tac yilal yic'ot i ñejt'ib. ¹¹Tsac sube ja': "C'ɔlɔl jach ilayi ma' tilel. Mach a ñusan ti p'is. Wa' jach jaxɔlet mi' caj ti ajñel a wa'al. Anquese chan ma' mel a ba wersa ma' jac' a tic'ol", cho'on.

¹²Ti pejtelel a jabilel ma'anic tsa' sac'a pañimil ti' caj a t'an mi junyajlic. ¹³Ma'anic tsa' wac'ɔ ti pam ñumel i saclel pañimil cha'an mi' puts'esan jontolo' ba. ¹⁴Che' woli ti pasel

q'uin mi' yac' ti q'uelol i yebal panchan. Mi' tsictesan wits yic'ot joctal. Che' wolix i pas i ba q'uin mi' lu' tsictesan.

¹⁵ ¿Tsa' ba a bac'tesa xjontolilob ya' ba' mi' yajñelob? ¿Tsa' ba a maclabe i c'ab xjontolil che' woli ti jats'?

¹⁶ ¿Tsa' ba ochiyet ti yebal colem ñajb cha'an ma' can ñumel i ch'eñal ba' ch'oyol i ya'lel? ¹⁷ ¿Tsa' ba pasbentiyet i yochib chamel? ¿Tsa' ba c'otiyet ti' yochib ic'yoch'an ba? ¹⁸ ¿Tsa' ba a lu' q'uele i pam pañimil?

¹⁹ Subeñon mi awujil pejtel jini. ¿Baqui ch'oyol i saclel pañimil? Pasbeñon i bijlel. Subeñon baqui tilem jini ic'yoch'an ba. ²⁰ ¿Mejl ba a tsajcan majlel c'alal ba' ch'oyol? ²¹ Wen awujil ti pejtelel come i yascunet pañimil. Cabal jax a pusic'al come wen ñoxetix.

²²⁻²³ ¿Tsa' ba a q'uele ba' tsa' p'ojli i ña'al tsañal yic'ot tuñija'? I wentajach e'tijibal cha'an i yorajlel guerra. Jal tsac tempa cha'an mic chocbeñob tilel wocol winicob woliyo' ba ti leto.

²⁴ ¿Baqui ch'oyol i saclel pañimil? ¿Bajche' mi' pam ñumel ti pañimil? ¿Baqui ch'oyol jini tiquin ba ic' am ba i ticwalel?

²⁵ Subeñon majqui tsi' mele joctal ba' cholocña mi' cha'len xambal majlel ja' che' mi' yujtel wen ja'al. ¿Majqui tsi' melbe i bijlel chajc yujil ba t'an? ²⁶ Mi' choc tilel ja'al ti jochol ba lum yic'ot ti tiquin lum ba' ma'anic xchumtal, ²⁷ cha'an mi' jastiyel ya' ba' ch'ijiyem, cha'an mi' pasel tsiji' ba jam.

²⁸ ¿Am ba i tat ja'al? ¿Majqui i ña' ye'eb? ²⁹ ¿Majqui tsi' yac'la i tuñil ja'? ¿Majqui tsi' teche i ña'al tsañal? ³⁰ Jini ja' tilem ba ti panchan mi' yac' i tuñija' lajal ba i tsatsel bajche' xajlel. I pam jini colem ja' mi' tsats'an.

³¹ ¿Mejl ba a tic' jini ec' ti' bijlel? ¿Mejl ba a jitben i cajchil i ñac' Orión? ³² ¿Mejl ba a suben q'uextayel i yorajlel jajmel yic'ot ja'lel? ¿Mejl ba a pasben i bijlel jini Osa yic'ot i yal? ³³ ¿A cañal ba jini mandar tac am ba ti' wenta panchan? ¿Awujil ba bajche' c'ayal lum yic'ot panchan?

³⁴ ¿Mejl ba a pay tilel ja'al ti tiquin pañimil? ¿Mu' ba i jac'beñet a t'an tocal che' ma' pejcan? ³⁵ ¿Mejl ba a choc majlel chajc baqui a wom? ¿Mu' ba i subeñet umba'añon? ¿Che' ba mi' jac'? ³⁶ ¿Majqui tsi' yaq'ue i ña'tibal pejtel cuxul tac ba? ¿Majqui tsi' cantesa bajche' yom melol? ³⁷ ¿Majqui yujil i tsicol tocal? ¿Majqui mi' choc tilel ja'al che' bajche' mi' xitchocontel uc'um? ³⁸ ¿Mejl ba a wac' ti p'ojlel oc'ol?

³⁹ ¿Mejl ba a wɔq'uen i colojm jini ña' bajlum cha'an mi' lajmesɔben i wi'ñal i yal? ⁴⁰ ¿Mejl ba a wɔq'uen i bal i ñac' che' cotel ti mal ch'en yic'ot che' woli ti chijt ti mate'el? ⁴¹ ¿Majqui mi' we'san jini i'ic' xiye' che' wi'ñayix i yal, che' mi' pam ñumel ti saclaya?

39 ¿Awujil ba che' mi' tojp'el jini chivo am ba ti wits? ¿Tsa' ba a q'uele ña' me' ti bajq'uel? ² ¿Jayp'ejl uw cantabil i yal? ¿Awujil ba baqui ora mi' tilel ti pañimil? Mi' lutschocon i ba, ³ mi' yac' i yal. Mi' cha' wen'an. ⁴ P'atɔl tac i yal. Mi' colelob ti jamil. Mi' majlelob. Ma'anix mi' chan sujtelob.

⁵ ¿Majqui tsi' cantesa jini burro mach ba anic i yum? Yilol jach mi' ñumel baqui jach yom. ⁶ Tsac pasbe ba' jaxal mi' majlel ti tiquin lum. Ya' mi' yajñel ti ja'lumil am ba i yat'smil. ⁷ Mi' puts'tan xchumtal. Ts'a' mi' yubiben i t'an xwets'oñel. ⁸ Mi' ñumel i saclan jam ti wits. Mi' majlel baqui jach mi' taj pime.

⁹ ¿Yom ba i coltañet jini jontol ba wacax? ¿Mu' ba i jal'an jump'ejl ac'lalel mi' tsa' pasbe i bal i ñac' ti buc'ujib? ¹⁰ ¿Mejl ba a cach ti te' cha'an mi' pic majlel lum? ¿Mejl ba a cantesan cha'an mi' top' lum ya' ba' a wom? ¹¹ ¿Ñuc ba ti a pusic'al cha'an cabal i p'atɔlel? ¿Mu' ba caj a pijtan jinto mi' ch'ambeñet tilel a c'ajbal? ¹² ¿Mu' ba caj i cuchbeñet tilel trigo cha'an mi' tempabeñet ya' ba' mi' jajts'el?

¹³ Tsats mi' les i wich' jini ja'al pech avestruz. Pero mach cha'anic i yutslal i pusic'al. ¹⁴ Mi' clay i tun cha'an mi' tojp'el ba' tiquin ji'. ¹⁵ Mi' junyajlel clay ba' bɔbɔq'uen mi' t'uchtantel. Mi' tsa' ñumi bate'el bɔbɔq'uen mi' pets' t'uchtan. ¹⁶ I ña'al mut ma'anic mi' p'untan i tun. Mach i cha'anic i yal yubil. Ma'anic mi' wis ña'tan mi' lolom jach i ye'tel. ¹⁷ Dios tsi' chilbe i ña'tibal. Ma'anic tsi' yɔq'ue i pusic'al. ¹⁸ Che' mi' les i wich', numen ora mi' majlel bajche' winic c'achal ba ti caballo.

¹⁹ ¿Mu' ba a wɔq'uen i p'atɔlel jini caballo yujil ba guerra? ¿Mu' ba a wɔq'uen i tijcan i tsutsel i bic'? ²⁰ ¿Mu' ba a suben tijp'el che' bajche' saj'? Mi' bac'tesan winicob che' pusiña i ni'. ²¹ Mi' jats' i yoc ti lum cha'an yomix majlel ti guerra. Tijicña i pusic'al cha'an cabal i p'atɔlel. Mach yujilic bɔq'uen. ²² Mi' tse'tan jini bɔbɔq'uen jax ba. Ma'anic mi' mel i pusic'al. Ma'anic mi' xoy i bijlel che' mi' q'uel espada. Chec'law i yotot

jalajb am ba ti' t'ejl. ²³Mi' ñijcuyel i yotot jalajb ti' t'ejl i contra. Sacleman i ñi'il espada yic'ot jec'oñib. ²⁴Woli ti lujt'el i bac'tal cha'an yom jax majlel. Yomix majlel ti ajñel cha'an tsa'ix i yubibe i t'an trompeta. ²⁵Che' mi' wustal trompeta tijicña mi' cajel ti t'an. Mi sic' jini guerra che' ñajt to woli' tilel. Mi' yubibeñob i t'an capitañob yic'ot soldadojob.

²⁶Che' mi' letsel ti chan jini gavián cha'an mi' majlel ti sur, ¿cha'an ba a ñatibal mi' toj'esan majlel i ba? ²⁷Jixcu jini xiye' mu' ba i mel i c'u' ti chan, ¿cha'an ba a mandar mi' mel? ²⁸Mi' cottal ti pam xajlel ti' chanel colem wits. Mi' chumtal ti' jajp xajlel ba' mach i tajayic i contra. ²⁹Mi' chijtan i bal i ñac'. Ti ñajtal mi' q'uel. ³⁰Wo'atax i yal, mi' masan i ch'ich'el i we'el. Ya' ba' mi' tsansantel i colojm ya'ix an i tat, che'en lac Yum.

40 ¹⁻²Lac Yum tsi' chan pejca Job: Jini woli ba i ya'leñon, ¿yom ba ochel ti leto yic'ot jini Mach ba Anic i P'isol i P'atalel? Jini yom ba i ya'len Dios, la' i sub, che'en lac Yum. ³⁻⁴Job tsi' jac'be lac Yum: Awilan, ¿chuqui j c'ajñibal? ¿Chuqui mi mejlel c sub? Mic mac quej. Ñach'alon. ⁵Tsa'ix c cha'le t'an pero mach yomix mic cha' sub. Cha'yajlix tsac cha'le t'an pero jasalix. Mach chan comix, che'en.

I tsictesantel i p'atalel Dios

⁶⁻⁷Lac Yum tsi' sube Job ti sutujt ic': Cachax a ba. Pasa a ba ti ch'ejl che' bajche' winic. An chuqui com c'ajtibañet. Jac'beñon. ⁸¿Mu' ba a ña'tan mach tojonc? ¿Mu' ba a ña'tan an c mul? ¿Mu' ba a sub a ba ti toj? ⁹¿Lajal ba a c'ab bajche' i c'ab Dios? ¿Mejl ba a cha'len t'an che' bajche' i t'an chajc?

¹⁰Pasa a ba ti ñuc che' bajche' rey mu' ba i yumañob winicob. Tsictesan a ñuclel cha'an mi' wera jac'ob a mandar. ¹¹Pasa a ba ti mich' cha'an mi' ch'ujbiñetob jini chaño' ba. Ju'sabeñob i pusic'al. ¹²Q'uele jini chaño' ba i pusic'al. Chocoyob jubel. Jisan xjontolilob ya' ba' wa'alob. ¹³Laj mucuyob ti ts'ubejn. Ñup'uyob ba'an chameño' ba. ¹⁴Mi awujil melol che' bajche' jini, mux c sub ñuquet, come che' jini mi mejlel a bajñel coltan a ba.

¹⁵Q'uele jini colem bate'el am ba ti ja'. C melbalach che' bajche' jatet. Mi' c'ux pimej lajal bajche' wacax. ¹⁶Q'uele i ya' yic'ot i pat ba' chucul tac i bac'tal. ¹⁷Che' mi' sats' i ñej che'lach yilal bajche' ch'ujte'. Jalbil tac i chijil i bac'tal i ya'. ¹⁸Lajal i

baquel bajche' tubo tac melbil ba ti tsucu taqu'in. Lajal i yoc bajche' barrilla tac melbil ba ti fierro.

¹⁹Wen jontol jax, ñumen bajche' yan tac ba bate'el tsa' ba i mele Dios. Jini yom ba i yuts'esan, la' i ch'am tilel espada.

²⁰Jini mate'el mi' yaqu'uen chuqui tac jach yom i c'ux ya' ba' mi' tilelob ti xambal pejtel bate'el. ²¹Mi' cottal ti amuyol ti' ti' ja', mucul ti yebal colem tac ba i yopol. ²²Jini te' am ba colem ba i yopol mi' mac ti' yaxñilel. Jini tsu'um am ba ti' t'ejl pa' mi' joye'. ²³Che' mi' bujt'el ja' mach yujilic baqu'uen, come wen ajñel mi' majlel. Mi tsi' wets'e jini Jordán ja' ti' tojel i wut, xuc'ul i pusic'al. ²⁴Ti pejtelel ora yaxal i yo che' mi' tajob winicob. ¿Mejl ba i chucob ti yac? ¿Mejl ba i cacchbenob i ni' cha'an mi' p'ayob majlel?

41 ¿Mejl ba a luc loqu'uel ajin ti a lucojib? ¿Mejl ba a cacchben i yac' ti' xac'ti' yic'ot lazo? ²¿Mejl ba a julben i ni' ti lazo? ¿Mejl ba a jec'ben i xac'ti' ti lanza lawux? ³¿Mu' ba i c'ajtibeñet ti wocol t'an cha'an ma' p'untan? ¿Mu' ba i pejcañet ti uts ba t'an? ⁴¿Mu' ba i yac' i ba ti a wenta cha'an ma' c'an ti to'ol e'tel jinto mi' chamel? ¿Mu' ba i bac'ñañet? ⁵¿Mejl ba a wuts'esan che' bajche' te'lemut? ¿Mu' ba caj a waqu'ueño xch'oc ba a walobilob cha'an mi' yasiño? ⁶Jini xchuc ch'ayob, ¿mu' ba caj i chombeño jini mu' ba i cha' choño? ¿Mu' ba caj i t'oxbeño i pi'lob cha'an mi' c'uxob? ⁷Mi tsa' julbe i pachilel ti lucojib o mi tsa' julbe i jol ti lanza te', ¿mu' ba caj i yubin?

⁸Mi tsa' wac'a a c'ab ti' jol, mi caj a chan ña'tan chuqui tsi' tumbeyet. Jasal junyajl. Mach cha'yajlic mi caj a mel. ⁹Lolom jach ma' ñop a chuc. Balaqu'uen jax majqui mi' lon ñop i chuc. ¹⁰Ma'anic majqui mi' lon ña'tan i ñijcan. Jini tonto ba ja'el mi' bac'ñan. Mi che'ach i bac'ñantel, ¿mach ba anic c bac'ñantel ja'el? ¿Majqui mi' wa'tal tic tojel? ¹¹¿Am ba ba' tsajniyon ti c'ajtiya? ¿Am ba chuqui tsac majña mu' ba caj c cha' sutqu'in? Pejtel chuqui an ti yebal panchan c cha'añach.

¹²Yom mic subeñet ja'el bajche' an i bontalel yic'ot bajche' c'amel an i p'atalel i cuctal yic'ot i yoc. ¹³Ti pejtelel ora ma'anic majqui tsi' ts'ulbe i pachilel. Ch'ajyatax i pachilel. Ma'anic majqui tsi' sal jec'be i sujl. ¹⁴¿Majqui mi mejlel i jamben i yej? Balaqu'uen jax i baquel i yej. ¹⁵Jini i sujl am ba ti' pat mi' ñap' i ba ti lajm ti lajm. Wen lap'al tac che' bajche'

sello. ¹⁶Mach ñumic ic' ya' ba' lɔp'ɔl tac i sujl. ¹⁷Ma'anic chuqui mi mejlel ti ñumel. Ma'anic majqui mi mejlel i ts'ulben i sujl.

¹⁸Chɔ'ach yilal i ja'tsijn bajche' i nich c'ajc. Añach i c'ac'al i wut che' bajche' i c'ac'al q'uin ti sac'an. ¹⁹Mi' loq'uel c'ajc ti' yej yic'ot i nich tac c'ajc. ²⁰Mi' loq'uel ic' ti' ni' che' bajche' i yowix ja' woli ba' ti lojc ti p'ejt c'ac'al ba' ti yoquejt ya' ba' woli' pulel jomoch'. ²¹I yiq'uilel i yej mi' xic' c'ajc ba' ñach'al abac. Mi' loq'uel c'ajc ti' yej.

²²Cabal jax i p'atlel i bic'. Baqui jach mi' majlel mi' toj sajtel i pusic'al majqui jach mi' lac' i ba'. Mi' c'un'an pañimil ti baq'uen. ²³Mi' pac' i ba' i pachilel. Ch'ajyatax i bac'tal. Ma'anic i lewil. ²⁴Tsats i pusic'al che' bajche' xajlel, che' bajche' ña'tun. ²⁵Che' mi' letsan i jol, mi' cajelob ti baq'uen jini p'atlo' ba'. Mi' toj sajtelob i pusic'al. ²⁶Lolom jach mi' lac jul ti espada mi' ti machit mi' ti yan tac ba' e'tijibal. Ma'anic mi' may i ba'. ²⁷Jini fierro lajal jach mi' q'uel bajche' jam mach ba' wisilic i p'atlel. Jini chachac taq'uin lajal jach bajche' i yoc'beñal te'. ²⁸I te'el lac jalajb mi' lon taj. I tuñil lac parantun lajalach ti' wut bajche' tiquin ba' jam. ²⁹Lajal mi' q'uel jini jats'onib te' bajche' amuy. Che' saracña mi' yubiben i yiq'uilel machit, mu' jach i wajlen. ³⁰Che'ach i yebal bajche' i sajl tac uc'um. Baqui jach mi' ñumel mi' clytal i yejtal tac i ñac' ti oc'ol.

³¹Ya' ba' mi' ñijcan i ba' mi' cajel ti lojc ja' che' bajche' ti p'ejt am ba' ti c'ajc. Mi' tit'esan jini colem ñajb che' bajche' ts'ac am ba' ti limete. ³²We'ecña ja' ya' ba' tsa' ñumi. Sac' i lojc che' bajche' i tsutsel xñoxob. ³³Ti pejtelel pañimil ma'anic yamba' bac'ñabil ba' bajche' jini. I bajñel mach yujilic baq'uen. ³⁴Mi' ts'a'len chuqui tac wen chan. I yumach pejtel mu' ba' i chañ'esaño i ba'. Che' tsi' yala lac Yum.

Job tsi' subu i mul

42 ¹⁻²Job tsa' caji' jac'ben lac Yum: Cujil melel awujil melol pejtel chuqui an. Ma'anic majqui mi' mejlel i ma'actañet che' an chuqui ma' ña'tan a mel. ³Tsa' lon sajtiyon tic t'an che' bajche' tsa' wala. Ma'anic tsac ch'ambe isujm. Tsac taja ti t'an jini ñuc tac ba' mach ba' cambilic c' cha'an. ⁴Awocolic, ñich'tañon. Mi' caj c' pejcañet. Ma'anix chuqui mi'

caj c chan c'ajtibeñet. Tsa'ix a laj subeyon. ⁵Ti yambΛ ora tsa jach j cañayet cha'an i t'an yaño' bΛ, pero wale mij q'uelet. Mij cañet. ⁶Jini cha'an mic ts'a'len c bΛ. Mic tsic c pusic'al cha'an c mul. Mij q'uel c bΛ ti pec'. Mic buchtan lum. Mic mujlan c bΛ ti' tañil c'ajc, che'en Job.

⁷Lac Yum tsi' caya i pejcan Job. Tsa' caji i suben Elifaz ch'oyol bΛ ti Teman: Mich' mij q'uelet yic'ot jini cha'tiquil a cañayo' bΛ. Mach isujmic la' t'an. Isujm i t'an c winic Job. ⁸Cucuxla ba'an c winic Job. Ch'ambenla majlel wuccojt ch'iton bΛ i yal wacax yic'ot wuccojt tat tiñame'. Aq'ueñon ti pulantib cha'an la' mul. C winic Job mi caj i tajetla ti oración. Muc'ach c pasben i yutslel c pusic'al. Che' jini mi caj c ñusan la' mul, come uts'at tsi' tajayon ti t'an c winic Job, pero mach uts'atic tsa' la' tajayon ti t'an, che'en. ⁹Jini cha'an tsa' majliyob Elifaz ch'oyol bΛ ti Teman, yic'ot Bildad ch'oyol bΛ ti Suha, yic'ot Zofar ch'oyol bΛ ti Naaman. Tsi' cha'leyob bajche' tsi' yaq'ueyob mandar Dios. Lac Yum tsi' jac'be i t'an Job.

Tsa' cha' aq'uenti i wenlel Job

¹⁰Lac Yum tsi' yaq'ue Job i tijicñayel i pusic'al cha'an i wocol che' bΛ tsa' ujti i taj i pi'lob ti oración. Tsi' yaq'ue cha'yajl i ñumel jini chuba'añal añach bΛ i cha'an ti ñaxan. ¹¹Pejtel i yalobilob i tat yic'ot i cañayo' bΛ tsa' bΛ i pi'leyob ti yambΛ ora tsa' tiliyob ti' yotot Job. Tsi' c'uxuyob waj yic'ot. Tsi' pejcayob ti uts bΛ t'an cha'an mi' ñuq'uesabeñob i pusic'al, cha'an tsi' ñusa pejtel jini wocol tsa' bΛ i chocbe tilel lac Yum. Ti jujntiquil tsi' yaq'ueyob jujunq'uel taq'uin yic'ot jujunxojt matc'abal ti' majtan jach.

¹²Lac Yum ñumen tsi' yaq'ue i yutslel che' ñoxix. Tsi' cha' taja i wenlel che' bajche' ti yambΛ ora che' ch'iton to. Tsa' p'ojli i yalac' c'lalal añachix i cha'an chanlujump'ejl mil (14,000) tiñame' yic'ot wacp'ejl mil camello, yic'ot cha'p'ejl mil wacax, yic'ot jump'ejl mil burro. ¹³Tsi' yaq'ue ja'el wuctiquil ch'iton bΛ i yalobil yic'ot uxtiquil xch'oc bΛ i yalobil. ¹⁴Tsi' yotsabe i c'aba' jini chichal bΛ Jemima, i c'aba' ijts'iñal bΛ jiñach Cesia, i c'aba' yambΛ Keren Hapuc. ¹⁵Wen i t'ojol jax jini uxtiquil. Ti pejtelel jini lum ma'anic lajalo' bΛ bajche' xch'oc bΛ i yalobilob Job. Job tsi' tem t'oxbeyob

i chubΛ'an yic'ot winic bΛ i yalobilob. ¹⁶Lac Yum tsi' yΛq'ue Job yambΛ wucc'al i jabilel. Tsi' q'uele i yalobilob yic'ot i yij yic'ot i yalobilob i yij c'ΛΛΛ ti' chΛnlajmlel i p'olbal. ¹⁷Wen ñoxix tsa' chΛmi Job che' cabΛlix tsi' yubi i tijicñayel i pusic'al.